


Xotei ido Sam Mak
ana Inggrengalox



Mark in the Sam language of Papua New Guinea

Xotei ido Sam Mak ana Inggrengalox
Mark in the Sam language of Papua New Guinea
Buk Mak long tokples Sam long Niugini

copyright © 2020 Wycliffe Bible Translators, Inc.

Language: Songumsam (Sam)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-08-18

PDF generated using Haiola and XeLaTeX on 11 Mar 2026 from source files dated 12 Dec 2025
216bca1d-a813-5945-b6a4-4f8ece26edbc

Contents

Mak	1
---------------	---

Xotei ido Sam Mak ana Inggrenalox Xelesam Kulu xax Mak sam wa inggrenalox.

Mak Yesus xasi mendelxo, adu Xotei ido ngidibi toto. Sis adu mendelxo, Yesus adu Xotei ido bail dili. Kristen kulig pes soubx ne Mak xoxnjulxo. Nenxasi adu Kristen bail dinjisne inggrenalox. Adu Kristen munjurulxo, "Bail asi sax." Adu inggrenalox ne, Rom kauntri lambeiyai jagar ubersine adu gavman palxo. Nedine Mak adu xeles Rom xo Satan isxo bail ne Yesus ana yelui yixo. Nenxa Mak ana Kristen Rom xabe soubx nenx xasi inggrenalox.

Suma yena inggrenalox.

Mak ido donyam beli Jon Mak silxo. Nal nenx Yesus Xotei ido kinggal yisilxo ne Mak xelagu silxo. Nenxa adu Yesus jagar olajal. Nedine Mak adu Jerusalem taun si dalxo. Sisne sumaxangglisja Yesus xasi sam munjurisoubxo, ne Mak indo sam ne xiyalxo. Bunge Pol xo Banabasx ana Mak pes mox Xotei ido sam sumaxangglisja publabdis munjurisoubxo. Bunge Mak Pita jagar Rom si soubxo. Pita adu Yesus ido kinggal ne xoxlox, ne Mak wasayi huyulxo. Mak adu sam wa inggrenalox ne nal AD 55 ko AD 65 mbelem nenxabe.

Mak sam ngisili tadaiyixo.

1. Yesus Xotei ido kinggal kuluilox (1.1-13)
2. Yesus Galilis kinggal kuluisi sumaxangglisja sam munjurulxo (1.14—6.29)
3. Yesus Galili udisne kauntri dagi xabe mos sumaxangglisja sam munjurisilxo (6.30—9.32)
4. Yesus Galili aib mos sumaxangglisja sam munjurisilxo (9.30-50)
5. Yesus Judia xo Pereax sumaxangglisja sam munjurisilxo (10)
6. Yesus ido miyax nal kulubalox, nenxasi adu sumaxangglisja adu mangau yisilxo ne munjurisilxo (11—15)
7. Yesus adu mesne aib tingalox (16)

Jon Baptais ana gaman gerei yixu.

¹ Sam wa Xotei ido ngidibi ido sam beli kului. Ido donyam Yesus Kristus.

² Propet Aisaian inggrenalox,
"San hajo mob suma so ada nyi udumbin nomi ana kulodxo.

Adun ino gaman gereidox.*

³ Suma be ido ma angi so rauxbe sam des ne mendelxo,
"Xiliyai ido gaman gereisine,
so tenemdx."

⁴ Silane Jon Baptais desne so raurxbe nenxa sumaxangglisja yag kunggu dinjisilxo. Ido sam ne publab disne sumaxangglisja une yi soubxo ne udisne aib bulbane Xotei ana une xendei hunjax munjurulxo.

⁵ Judia distrik xo Jerusalem taunx isxo sumaxangglisjax kumogxo adu sib mo soubxo. Andug indo une babdubane Jon ana Jodan yag kunggu dinjisilxo.

⁶ Jon kamel ido uli ne bugax tag sine let kalembe xerix disilxo. Sisne adu habu xo bisin gax ya hesilxo.

* 1:2 Malakai 3:1 sam kulu sux nedi.

7 Wa ido sam, "Sa bungex be suma be bail ana maxdixo. Adun sa yelubixone yoglodxo. Sa suma beli jal pinden ana ido su ido sel ne mberengdax kerejal.

8 Sana nyingga yag kunggu dinggixam, nedine adun nyingga Kanin Mundor ana baptaisnggedxo."

Yesus yag kungguasine toum maglib minjelxo.

9 Nal nenxa Yesus adu Nasaret taun Galili distrik maglib inggam lelane Jon ana Jodan yagbe yag kunggu dulxo.

10 Yesus yagbe sam loxolane lang hobox asine Xotei ido Mundor ne langbe sam goul pala yogololxo.

11 Silane ma be lang bugbe sam yogololxo. Ma ne adu sis mendelxo, "Nyi hajo du, sa nyi dobisx na, sa nyi xasi pari beli xiliyai bisxna."

12 Sis nenx ya Kanin Mundor ana gasanx soilane so raurbe minjelxo.

13 Adu mosne so raurbe meleng 40 silane Satan ana toum lox. Adu werapin juwan jagar silane Xotei ido sombu andug ana xumar soubxo.

Yesus ido sox suma manji kuluilox.

14 Bungex Jon talu halib hogobane, Yesus Galili distrik be mosne Xotei ido sam beli publab dis munjurulxo.

15 "Nal dax ne de xuradixo," adu mendelxo, "Xotei ido kingdom dax kulubx na bulsine Xotei sib minjax!† Ido sam beli wa xabu ud ayax!"

16 Saimon xo ido aubi kanangge Endrux xumam xedel ne isxo kinggal, nenxa yag korob suwen asui soulxo. Sisne Yesus adu Galili yag koro xou soxsine woxsi asux xoxnjulxo.

17 Yesus ana manjis munjurulxo, "Les sa soxbela! Silane sana nyisxa suma pax suwen xasuiya usnernggedxm."

18 Nal nenx ya gasanx asux isxo suwen udisne adu sox youlxo.

19 Adu giringx si mosne Jems Sebedi ido ngidibi xo ido aubi kanangge Jonx kubung maglib seoulx ne xoxnjulxo. Asux suwen gerei seoulxo.

20 Gasanx Yesus asux manjulxo. Asux isxo alabi Sebedi kubung maglib nenxa kinggal suma jagar uдинjisne asux Yesus sox youlxo.

Yesus mundor hali xendeilox.

21 Andug Kapenamx taun minjoubxo. Sabat nal‡ alane Yesus Ju indo bojou maglib mosne sumaxangglixja xeke hunjisilxo.

22 Adun andug sam munjiri silxo ne, suma xeke pe xuraxo nedana sam palai silxo. Nenxa sumaxangglixja andug adu sam publab dulx ne andug pudox hali aiyoubxo. Adu manam sam ido xeke suman sam palaijal.

23 Sis silane suma be mundor hali ana alul lox ne Ju indo bojou inggam maalox,

24 "Yesus, Nasaret suma, nyi ga koxra gax si? Nyi ga alul gax lexam, e? Sa nyi xeke nyi Xotei ido suma une xujalxo!"

25 "Tenenem a!" Yesus ana korlox, "Nyi hamegx adu udisne habrex da!"

26 Mundor halin suma ne hagdulane rexexasi xoeng alulsine habrexbe dalxo.

27 Sumaxangglixja pudox hali amai youbxo. Sisne andug indo indo da inar aiyoubxo, "Mangau wa xa? Sam wa kexei ido bail dili! Adu mundor hali hegaganji xanden andug adu sam xe huiyisxa."

28 Adu ido sam ne Galili distrik maglib nenx ya serx belelai lox.

† 1:15 Kingdom sam ne sumaxangglixjax xo pinhalel kumogx suma be bogagub sixa. ‡ 1:21 Sabat nal ne Ju indo arpersi Xotei donyam pidingdax nal.

Yesus suma xo xangglixja lambeiyai gamba aiyox di hunjul beli aiyoubx.

²⁹ Andug Ju indo bojou serx udisne Jems xo Jonx jagar Saimon xo Endrux isxo urumbe minjoubxo.

³⁰ Saimon ido mugumabi do ngaring lane wil asilxo. Nenxa andug ana Yesus adu xasi serx mundoubxo.

³¹ Silane adu xanggli ne sib mosne barge pesne soxorlox. Do ngaring adu udulane adu andug dubli palxo.

³² Sabat nal ayox alane bunge seng kulolane suma kumogx indo gembax suma xo suma mundor halin alulnjulxo ne garwernjis Yesus sib leubxo.

³³ Taun ne maglib sumaxangglixja kumogx lesne urum mbour kulub nenxa tumbang aiyoubxo.

³⁴ Siylane Yesus ana gamba kulu dide dide aiyoxdi hunji silxo. Sisne mundor hali lambei xendei hunji silxo. Andug adu suma ye ne andug xele nenxa adu mundor hali xarwinji xanden samajal.

Yesus idoi so derxbe mos geinalox.

³⁵ Koglix hali so xaluxalugx, Yesus xuduasine so derx beb mosne geinalox.

³⁶ Saimon xo kinggal suma dagi jagar adu xedelasi mos

³⁷ tordisne mundoubxo, "Sumaxangglixja kumogx nyi xedel mbisxa!"

³⁸ Yesus andug sis munjurulxo, "Ga tubarbeb bili mosne sa sam nenx pubblab duda. Sa kulu nenx xasi yoglomonxo."

³⁹ Sisne adu Galili distrik maglib nenxa lumbiasine Ju indo bojoubesam pubblab disne mundor hali xendeinji silxo.

Suma hogar nyam wo dili.

⁴⁰ Suma hogar nyam wo dili ne adu sib les tomblongsine gwari inaralox, "Ae, nyi sa gereibax ud asine sa jaxal dube."

⁴¹ Yesus adu xasi pari xurang sisne barge soxorsi adu usub pidelxo ne sis mundulxo, "San yudxm. San nyi jaxal dumbixam!"

⁴² Gasanx hogar nyam wo ne suma ne udulane adu beli alox.

⁴³⁻⁴⁴ Yesus suma ne serx soisine kokoilox, "Suma be mundi mundiyaxjal nedine ino dodamug nei mosne Xotei ido kinggal suma ne usernjax. Sisne jaxal ido atra Moses ana manam sam bail dulxo ne soxsine jaxal ido atra ne yax, mangau simane suma xeles aiyaxabarxo ino gamba ayox ayiux."

⁴⁵ Nedine adu mosne ido beli alox ne sumaxangglixja sam ne boyoalox. Silane Yesus adu taun be palagx duxa dejal, ne adu taun xoub silxo. Nedine suma so kumogx adu sib le soubxo.

2

Yesus suma barge xo kwesangx mexo ne gereilox.

¹ Meleng dagi udisne, Yesus bili Kapenamx taunbe minjelxo. Suma kumogx xeubx ne adu ido urumbe silxo.

² Nenxa suma lambeiyai tumbang asine urum maglib talu be lolx si jal max asine les habrexbe mbourbe ne dide andosomx max tegteg aiyoubxo. Siybane adun Xotei sam pubblab disilxo.

³ Suma 4 suma be kwesang xo bargex mexo ne xuwa baxlub sam soxomasi leubxo.

⁴ Sumaxangglixjax ana so ne max tegteg abane andug suma ne pes Yesus sob minjax kumbli asine urum kunda xoxeng disne suma kwesang

xo bargex mexo ido xuwa baxalu ne inggam sel be sam gosing dubane Yesus parib kulolxo.

⁵ Yesus adu indo xabu ud xoxsine adu suma barge xo kwesangx mexo ne mundulxo, "Du, ino une ayox."

⁶ Manam sam ido xele suma dagi nenx njanjan soubxo. Ne andug indo udud maglib ud siyoubxo,

⁷ "Kulu xax suma ne adu sam sis mendex na? Adu Xotei asreisi ne awau sixna! Suma yen une xendeyax kere? Xotei idoi kere!"

⁸ Yesus adu ido udud maglib gasanx xele uradulxo ne andug ud suxne pes soubxo. Siybane adun sis munjurulxo, "Kulu xax nyingga ud suxne pesxa?"

⁹ Sam uran xa suma wa munduda? 'Ino une ayox' ko 'Ting asi ino baxalu pes minje' ko?

¹⁰ Ne nyingga xele siyax, Suma ido Ngidibi adu miyanghai gub sumaxanglixjax une xendei hunjax bail dili." Adun suma barge xo kwesang mexo ne mundulxo,

¹¹ "Sana nyi mumbrixama tingasi ino xuwa baxalu pes ino urumbe minje."

¹² Adu tingasi suma kumogx nyambe ido xuwa baxalu gasanx pesne minjelxo. Nedana suma kumogxo pudox hali asine Xotei donyam peding disne sis mendoubxo, "Xehei, ga mangau sux wa nomi be xoxjal tenemxo!"

Yesus Liwai mailox.

¹³ Yesus bili yag koro xoub minjelane sumaxanglixjax lambeiyai les adu sib tumbang aiyoubxo. Siybane adun Xotei ido sam manamnjisilxo.

¹⁴ Adu xensi mosne Alpius ngidibi Liwai takis pesxa sob nenxa njan asilxo xoxsine mundulxo, "Sa soxbe." Yesus ana sis mundulane Liwai tingasine soxlox.

¹⁵ Yesus Liwai urumbe pin hes silane andug lambeiyai adu sox soubxo. Nenxa takis pesxa suma xo une suma xo Yesus ido sox sumax, adu jagar njanasi pin hes soubxo.

¹⁶ Parisi* andug manam sam ido xele suma andug ana adu xox youbexo ne adu une suma xo takis pesxa suma jagar pin hes silane andug ana ido sox suma inarnjoubxo, "Kulu xax adu takis pesxa suma xo une sumax jagar pin hes na?"

¹⁷ Yesus sam ne xes ne munjurulxo, "Suma gamba xujalxo ne dokta sob mo jalxa, suma gembax ya ne andug dokta sob mosxa. Sa suma une xujalxo ne manjax yogoljal, sa suma une dili nenx xasi yoglomonxo."

Suman Yesus pin kudeng ayax inar youbxo.

¹⁸ Jon ido sox suma xo Parisix andug pin kudeng ayoubxo. Siybane suma dagin lesne Yesus inar youbxo, "Kulu xax Jon ido sox suma xo Parisix indo sox suma xo andug pin kudeng asixa. Nedine nyi ino sox suma andug pin kudengajalx?"

¹⁹ Yesus ne xes ne aib munjurulxo, "Pinaxa suma xanggli pax ne nenx jagar simane ido marar pin kudeng ayaxbarxo? Adu andug jagar six na, nenxa andug siyax kerejal.

²⁰ Nedine nal be dadxo, nal nenxa xanggli pax suma ne pen didei dubane nal nenxa andug pin kudeng ayaxbarxo.

* **2:16** Parisi suma lola urum maglib soubxo, ne Sadyusi dide maglib soubxo. Andug datara asixa. Parisi indo mangau ne sux, sasaya mangau ne six. Andug sumaxanglixjax dagi kornjisne andug yax yisxa. Nenxa Yesus andug sam bail munjrisilxo.

²¹ Suma ben bugax jagre kexei penane bugax ai nggina ayaxman. Bugax kexei nedana ai ne mundrung dudux, ne bodox xiliyai dadxo.

²² Suma ben werapin xo mundrung penane wain kexei hogaxman. Wain bising ana denane wain xo werapin xo digi hali ayaxlox. Nenxa adu wain kexei ne werapin xo kexeib xuruxdox."

Yesus adu Sabat ido Aiyama.

²³ Sabat bexo Yesus adu wit yu mbelembe minjelxo. Silane ido sox suman wit dagi tam kului soubxo.

²⁴ Parisin adu mundubxo, "Pinaxa andug Sabat ido manam sam xulaisi mangau ne yix a?"

²⁵ Yesus ana aib munjurulxo, "Nyingga wasaajalxa ne Devid xo ido sox sumax mamnjul mangau xa youbxo a?"

²⁶ Nal nenxabe Abiata adu pris gadi silxo. Devid Xotei ido urum maglib mosne beret suma ben heaxjalxo pris indoiya heax ne adun kanin ne bubrax disne beret ne hesne ido suma jagar nanjulxo."

²⁷ Sisne adun munjurulxo, "Xotei sumaxangglisja Sabat toromyax koraajal. Xotei Sabat sumaxangglisja toromnjax koraalox.

²⁸ Nenxasi Suma ido Ngidibi adu dide sux Sabat ido Aiyama."

3

Yesus ana suma be gereilox.

¹ Nal bexo Yesus Ju indo bojou maglib minjelxo. Suma be barge kwadebx mexo ne adu nenx silxo.

² Nenxasi suma dagi andug Yesus Sabat xabe suma gereidox, nenxa andug nyam per soubxo. Andug ido ugel ne xoxsine mendax xasi.

³ Yesus ana suma barge mexo ne mundulxo, "Nyi wa lema!"

⁴ Sisne Yesus andug inarnjulxo, "Mangau xa Sabat xabe yaxmun ne beli? Mangau beli yax e, mangau hali yax e? Suma kexei sax toromnjax e, suma kiyangnjax e?" Sis munjurulane andug sam be mendejal tenenem asoubxo.

⁵ Adu andug xoxnjoulxo ne andug pari tunggulguljisilxo. Nenxasi adu pari beli jal adu agraglance adu suma ne mundulxo, "Ino barge padid yu." Adu barge padidlane ido barge belialox.

⁶ Parisi andug gasanx mosne Herot ido sox suma jagar andug gaman xab sam Yesus taxaleb miyax nenxasi sam keredi soubxo.*

Suma lambeiyai Yesus sox youbxo.

⁷ Yesus ido sox suma jagar andug so ne udisne andug Galili yag koro nenxabe minjoubxo. Sumaxangglisjax lambeiyai andug soxnjisne minjoubxo.

⁸ Suma lambeiyai adu mangau xa yisilxone andug xes ne adu sib leubxo. Andug Galili xo Judia xo Idumiax distrik sam leubxo. Jerusalem taunbe xo Taia xo Saidon taun kolinjis soubxo ne inggam sam leubxo. Jordan yag inggamxa sam leubxo.

⁹⁻¹⁰ Adu suma lambeiyai gereinjis silxane beli asoubx. Nenxa suma dagi gamba xone adu kundung dax nenxasi da bijaasi mo soubxo. Suma lambeiyai nenxa Yesus ana ido sox suma munjurulane kubung kanangge

† 2:25 1 Samuel 21:1-6 sam kulu sux nedi. * 3:6 Parisi suma lola urum maglib soubxo, ne Sadyusi dide maglib soubxo. Andug datara asixa. Parisi indo mangau ne sux, sasaya mangau ne six. Andug sumaxangglisjax dagi kornjisne andug yax yisxa. Nenxa Yesus andug sam bail munjrisilxo.

be pesne per huyubxo. Kulu xax suma lambei ana sin adu pari sung yax barxo.

¹¹ Mundor hali adu xoxsine tomblongsi xoeng haroisi sis mendoubxo, “Nyi Xotei ido Ngidibi.”

¹² Nedine Yesus ana andug sam kokonji silxo, andug adu suma ye ne sam boiyo aiyax kornjulxo.

Yesus ido sox suma 12 maranjulxo.

¹³ Yesus gabrab woxsine suma maranjixone manjulane adu sib xoubxo.

¹⁴ Adun suma 12 maranjulxone adu jagar sibane adun donyam aposel hunjudxo. Sisne adun sonjum mos Xotei sam pubblab disne

¹⁵ mundor hali xendei yax bail hunjudxo.

¹⁶ Yesus adu ido sox suma 12 maranjulxone indo donyam ne xiwad: Saimon, Yesus ana donyam Pita adu huyulxo,

¹⁷ Sebedi ido ngidibi Jems ne aubi kanangge Jon ne adun donyam Boanerges ne hunjulxo. Donyam nenx ido kulu ne “asux kele du pala.”

¹⁸ Ne Endru ne Pilip ne Batolomiu ne Metiu ne Tomas ne Jems, Alpius ido ngidibi, ne Tadius ne Saimon be adu Selot suma,

¹⁹ ne Judas Iskariot, Yesus ido sosolox suma.

Yesus xo Bielsebulx

²⁰ Sisne Yesus urum maglib pin heax mosne suma lambeiyai des tumbang abane Yesus ido sox suma jagar andug pin heax gogoin ayoubxo.†

²¹ Yesus ido malanggu sam xe sisne andug mendoubxo, “Yesus adu laxayiux.” Nenxa andug Yesus paxasi minjoubxo.

²² Manam sam ido xehe suman Jerusalem inggam yogolsine mendoubxo, “Bielsebul adu sib sixna! Adu mundor hali indo gadi nenxasi adu mundor hali xendei six.”

²³ Siybane Yesus andug manjisne yaul sam be sam munjurulxo, “Koxrai na Satan idoi aib Satan xendeidox?”

²⁴ Kantri be gobu ana indo indo aib xubrax barxone kantri ne si beli yaxman.

²⁵ Urum be maglib malanggu ne gobu ana indo indo aib xubrax barxone, urum ne si beli yaxman.

²⁶ Satan idoi aib ido xuber per huyudxone adu ido bail ne gobu ana adu bail tingayaxman. Adu ido nal ayox ne dex ined.

²⁷ Suma bena suma bail hali urum maglib mosne pinhalel lolx pax kerejal. Adu sel bail penane suma bail dili ne xaxoi xuradinane adu urum maglib monane pinhalel yuwemadox.

²⁸ Sa nyingga xabu munggrixam, Xotei ana sumaxangglixja indo une kumogx asreisine awau sixane hali ne ayox dudxo.

²⁹ Nedine Xotei ana sumaxangglixja ye Kanin Mundor asreisi awau sixane indo une ne xendeiyaxman. Une ne andosom sina sidxo.”

³⁰ Adu sam ne mendelxone pinaxa andug ana adu mundor hali dili mundoubxo.

Yesus ido anyibi xo aubi kubexo

³¹ Sisne Yesus ido anyibi xo aubi kubex lesne deubxo. Andug habrexbe tinggring asine suma be soibane adun Jesus pes lema.

† 3:20 Urum ne Pita xo Endrux isxo urum ne Kapenam six.

³² Suma lambeiyai ana adu kwalisi njanjan asoubxo. Nedana andug ana adu mundoubxo, "Ino ama xo au kubex nyi xedelmbis leberxo. Habrexbe sixa."

³³ Adu inarnjulxo, "Suma ye hajo ama xo au kubexo?"

³⁴ Sisne adu suma ye adu kwali soubx ne xoxnjisne munjurulxo, "Sa hajo ama kube xo aukube xone sixa wadi!

³⁵ Sumaxangglixa ye Xotei ido do ne sox sixane, ne hajo au kube, hajo mana kube, hajo ama kube."

4

Wit ido wig sumana yub taur youbxo nenx ido yaul sam.

¹ Yesus bili aib Galili yag koro xoub suma xeke hunjisilxo. Sumaxangglixa tumbangai adu xoul youbxo. Nenxa adu kubung bugbe pudoxasine njanasine yag koro bebeng udisne giringx minjelxo. Silane sumaxangglixa kumogx yag koro bebengbe nenxa soubx.

² Yesus adu mangau kumogx yaul sambe sam xeke hunjisilxo. Sisne andug sis munjurulxo,

³ "Nyingga xiyaba! Suma be mosne yub wit ido wig taur lox.

⁴ Adu wit ido wig taur silane dagi panjurungsi gamanbe kuloubane as ana lesne heoubx.

⁵ Dagi miyang belib koljal, miyang duma karong usub barig kolsine miyanghanggu ne kol tang xujalxo, nenxa wox gasan youbxo.

⁶ Nenxasi seng desne balag alane lilaalox, ne wit barig kol tang xujalxo. Nenxa wit xongrongasi miyalxo.

⁷ Wit wig dagi xaxare jingglang mbelembe kuloubx, ne andug wox sibane xaxare jingglang ana ngalagnjoubane andug iljal.

⁸ Wit wig dagi miyanghanggu belib kuloubxo, ne andug wox beli sine wit beli gasa ayoubxo, dagi beli 30, dagi beli 60, dagi beli 100."

⁹ Sisne Yesus adu sis munjurulxo, "Suma ye adu dab dinggini dili ne adu xiyamin."

¹⁰ Adu idoi silane ido 12 sox suma xo sumaxangglixa andug Yesus jagar seoubxane andug ana Yesus yaul sam xasi inar youbxo.

¹¹ Adu sis munjurulxo, "Nyingga Xotei ido kingdom ido holox sam ne hanggixu. Nedine andug suma xoubx sixane sam kumogx ne yaul sam be ingam munjiri silxo.

¹² Nenxa,
 'andug xox saxabarxo, nedine andug pongnjaxaman,
 andug sam xe saxabarxo, nedine andug xeke aiyaxabar,
 nedine andug indoi pari bul yaxabarx ne Xotei ana andug une xendei hunjudxo!' "*
 "

¹³ Sisne Yesus andug sis munjurulxo, "Nyingga yaul sam wa pongnggijal e? Suxne nyingga koxrai na yaul sam kumogx ne pongnggedxo?"

¹⁴ Suma wit wig taurlox, ne sux suma Xotei ido sam beli publab disx na.

¹⁵ Suma dagi andug wit wig gamanbe taurx ne pala. Nenxa suma andug sam xe gasan sixa, Satan ana lenane Xotei sam beli kweb maglib taurx ne xendei hunjudxo.

¹⁶ Ne suma dagi andug wit wig so miyanghanggu duma usub taurnjulx ne pala. Andug sam xesne pe gasan disxa, sisne pari beli sixa.

* 4:12 Aisaia 6:9-10 sam kulu sux nedi.

17 Nedine andug barig xujalxo, nexa andug si tangyaxabar. Suma dagin Xotei sam nenxasi kulig hunjinane alualul njaxbarxo, ne indo udud tei pesxa ne ganjang kulodx.

18 Suma dagi andug wit wig xaxare jingglang maglib nexa taurx ne pala. Suma kulu ne andug sam xesxa.

19 Nedine andug miyanghanggu wan ido pinhalel kumogx xasi ud lambei sixa. Andug indo jager udud dili sis andug moni pesne andug beli sax. Andug pinhalel lambeiyai dili ayax si, sisne andug miyanghanggu wanx ido pinhalel nenxasi pari proxounjix. Andug mangau nedana Xotei ido sam kakabu yixanden andug iljalxa.

20 Nedine suma dagi andug wit wig miyanghanggu belib kuliux ne pala, ne andug sam xesne pes bar sixane hepin babdisxa. Dagi beli 30, dagi beli 60, dagi beli 100."

Suma baxalu bogagub lam holodijalxa.

21 Sisne Yesus ana andug sis munjurulxo, "Suma bena lam penane wob kabududx ko baxalu bogagub pidedx e? Jalxo. Adu lam penane baxalu usub pidedxo.

22 Pinhalel kumogx holob sixane bunge palagdux babadox. Pinhalel kumogx ejex disxane bunge palagdux babadox.

23 Suma ye dab dinggini dili andenane adu xiyamin."

24 Yesus bili sis munjurulxo, "Sam nyingga xeberx ne nyingga udud beli si sax. Nyingga suma ye mangau xa yi hunjixsane kulu sux ne Xotei ana nyi xabe yinane bili usub toxeidox.

25 Suma ye pinhalel dili ne Xotei adun pinhalel dagi toxeidox. Nedine suma pinhalel xujalxo, ne Xotei ana pinhalel dukange baryiuxsix ne xendeidox."

Pin wig xolx ido yaul sam.

26 Yesus adu bili sis mendelxo, "Xotei ido kingdom sux ned, suma bena pin wig taur yul miyanghanggub kulolxo.

27 Kolu meleng adu wilasix xuduayiux ne pin wig idoi pongasi xoiyixo ne adu wox xaisix ne adu lol.

28 Miyanghanggu idoi siyix xandene pin wox six, sisne mete alum pers sanying sine beli asix.

29 Sisne wit ido beli xuradix xandenane korayax si ido nal kulub xandene adu korasix. Ne pin beli xuradixo."

Yo wig ido yaul sam.

30 Ne bili Yesus sis munjurulxo, "Ga Xotei ido kingdom pinxa pala mendaxamun? Yaul sam xa mende munda ne totoidox ne nyingga pongnggedxo?

31 Adu mastad ge ido wig pala. Adu ido ge ne nyaro nyaro ne nyi miyanghanggub besxama.

32 Nedine suman be andenane, adu wox amainane alum ne pin kumogx yu maglib sixane yeyelunjina, bar xili xiliyai nenxabe bugbe as lesne hamug ruxbe nenxabe jar per saxabarxo."

33 Yesus sumaxangglixja yaul sam be inggam munjri silxo. Indo udud xeleyax kere dinjisne sam munjri silxo.

34 Adu yaul sam be sam ya, sumaxangglixja sam munjri silxo. Nedine Yesus ido sox suma jagar ya sibane adu sam kumogx ne bisalsi munjri silxo.

Yesus ana mendelane tumur xiliyai ne ayoxalox.

³⁵ Nal nenxa seng kambung alane Yesus ido sox suma sis munjurulxo, "Ga Galili yag koro xoub inggam minjax."

³⁶ Sumaxanggljixa tumbangai nenx udinjisne Yesus kubung maglib silane andug adu jagar kubungbe minjoubxo. Nenxabe kubung dagi jagar minjoubxo.

³⁷ Andug mo sabane tumur xiliyai dalxo. Sisne yuwal palom kubung maglib minjelxo. Ne yuwal palom ana kubung max dax koraalox.

³⁸ Yesus kubung kulub bebengbe nenx gadi gulong persine wilasilxo. Ido sox suma adu xududis mundoubx, "Inggreng Suma! Nyi ga xasi daxaman ne ga yag hes padal ayaxamun e?"

³⁹ Yesus xuduasine tumur hegagaisine yag palom mundulxo, "Tenenema! Maninasi sema!" Silane tumur mesne so pong dulxo.

⁴⁰ Yesus adu ido sox suma munjurulxo, "Nyingga pinxa ula alul sixa? Nyingga xabu ud tei ajalxa e?"

⁴¹ Andug ula hali yisne indoi indo sam sis mendoubxo, "Wa ye e? Nenxa tumur xo yuwal palomx adu sam xe huyisxa!"

5

Yesus ana mundor halin suma nanar dulx ne xendeilox.

¹ Ne Yesus ido sox suma jagar Galili yag koro xoub inggamxa nenx Gerasenes indo miyanghanggub deoubxo.

² Yesus kubung udisne kulolane suma be mundor hali dili ne suma mexo hogsixa sob inggam gasanx les Yesus tordulxo.

³ Suma ne adu mexo sumaxanggljixa hogsixa sob nenxa wilasix. Nal ne suma ben adu xaxoi yax kerejal. Sen ana dide kerejal.

⁴ Nal lambei andug adu ido barge hankap ana axoisine kwesang ain ana tindeng youbxo. Nedine adu hankap xo ain dide sux titoxour silxo. Adu bail hali. Suma ben adu tindeng yax kerejal.

⁵ Meleng kere kolu meleng adu mex suma sob nenxa tombu gabra xalagbe nenxabe silxo. Adu xoengasine duma pes ne idoiya ido dodamug xanjaxanjang asilxo.

⁶ Suma ne Yesus weyexya sam xoxsine adu baxeingasi mosne Yesus parib tomblong lox.

⁷⁻⁸ Yesus adu sis mundulxo, "Mundor hali nyi suma wa udisne habrex da!" Silane adu sis maalox, "Yesus, Xotei Bugbex Tenemx Ido Ngidibi, nyi sa koxrabaxsi? Nyin Xotei donyambe sam sa alulbaxjal."

⁹ Sisne Yesus suma ne inarlox, "Nyi donyam ye?"

Silane adun Yesus sis mundulxo, "Ga lambeiyai sixamun. Nenxa hajo donyam Xajax Suma Lambei."

¹⁰ Sisne adu Yesus xoengasi inar sebei silxo simane adu so nenxabe xendeinjaxjal.

¹¹ Nal nenxabe bol lexeingai gabra xalagbe nenxabe pin he soubxo.

¹² Silane mundor halina Yesus xoeng huyoubxo, "Nyi ga bol lexeingbe so ge. Sisne ga xarui gem bol maglib minjaxamun."

¹³ Ne Yesus ana xaruinjulxo. Sibane mundor hali suma ne udisne bol maglib minjoubxo. Sibane bol lambei 2,000 suxne andug yag koro xou gabra xalag halib inggam nenx baxeing herrixasi kolsine yag hes moreng ayoubxo.

¹⁴ Bol xumar suma andug babaxeingsine taunbe so kumogx taun xoubx dide mosne mangau dalxone munjroubxo. Sibane sumaxanggljixa kumogx mosne mangau dalxone xox youbx.

15 Andug Yesus sib lesne suma mundor hali lambei ana marai youbexo, ne njanasi lane xox youbexo. Hameg adu bugax tagxi udud pong lane adu njanasilxo. Ne sumaxangglia xox sisne ula ayoubxo.

16 Suma ye andug mangau ne xox youbexo andug ana sumaxangglia munjroubexo. Ne suma be mundor halin marai la mangau dal nenxo bol moreng aiyoubx ne andug mendoubxo.

17 Silane sumaxangglia indo miyang nenxa Yesus sam bail mundis xoengasine adu so ne udis minjaxasi inaryoubxo.

18 Yesus adu kubung maglib minjax silane suma mundor halina alulox ne Yesus jagar minjax xoeng alox.

19 Yesus adu ongsi arwijal, nedine adu mundulxo, "Tubarbe ino aumbu sib minje, simane Aiyaman mangau kumogx nyi xabe yixone Xotei ido torom xo pari beli xo nyi xabe yixone munjra." "

20 Silane suma ne minjelxo. Adu mosne Dekapolis distrik indo sob nenxabe mangau xa Yesus ana adu xabe yulxone munjris xandelxo. Sumaxangglia andug udud lambei pesoubxo.

Dindongge be miyalxo nenxo xanggli be gembaxo

21 Sisne Yesus aib kubungbe sam yag koro inggamxa minjoubxo. Sumaxangglia lambei Yesus sixbe yag koro xoub lesne xunggurasi kwali youbexo.

22 Sisne Ju indo bojou ido gadi be adu lelxo. Ido donyam Jairus. Adu Yesus xoxsine lesne Yesus sib tomblong lox.

23 Sisne adu Yesus xoengasi inarlox, "Hajo janx dukangge be miyax kora asixna! Aee, Yesus nyina adu barge usub pidemane adu beli ana kexei sidxo."

24 Silane Yesus adu jagar minjelxo.

Sumaxangglia lambeiyai indo indo dabijaxasi adu sox soubxo.

25 Nenxabe xanggli be silxo ne adu 12 yar warum hwing silxo.

26 Xanggli ne dokta lambei ana torom soubxo sisne adu moni kumogx gouralox. Nedine andug ana xurang xiliyai huyisne adu ido gema huringen soubxo.

27-28 Xanggli ne adu Yesus mangau xa persilxo ne sam xiyalxo. Ne adu ud siylox, "Sa adu ido kolos ya kundung dudane sa gema beli dibedxo." Nenxa adu loxsine Yesus gomborbe sumaxangglia lambeiyai mbelem nenxa Yesus ido kolos ilong ne kundung dulxo.

29 Gasanx ido ker desilxo ne deralox, sisne ido dodamug be gema angxi silxone hag dulxo.

30 Yesus xeles gasanx dulxo ne bail lagi adu udisne minjelxo. Sisne Yesus adu xunggur maglib bulsi inaralox, "Yena sa kolosbe kundung dibixo?"

31 Yesus ido sox suma adu sis mundoubxo, "Nyi xoxayax, sumaxangglia lambeiyai ganggolmbisne da kundung asiberxo, ne inarnjax, "Yen sa kundung dibixo?" "

32 Nedine Yesus nyam kwarengasine xedelasine suma yena mangau ne yixo.

33 Siylane xanggli ne mangau xa adu xabe dalxone adu xealox. Adu lesne Yesus ido kwesang kulub tomblongsine ula asine kakaralox. Sisne xabu xabu mangau xa adu xabe dalxone mende kiridulxo.

34 Ne adu xanggli ne mundulxo, "Janx, ino udud tei ned ana ino gema pong dixo. Pari xosolox minjax. Nyi hameg belixama."

35 Yesus adu sam sis mudi silxane suma lagi Jairus urumbe sam leoubx. Jairus adu Ju indo bojou ido gadi silxo. Andug ana adu

mundoubxo, “Ino jan mexo. Pinxax nyi sina Inggreng Suma kulig huyudxm, a?”

³⁶ Nedine Yesus adu sam mendoubxo ne gugaringnjulxo. Yesus Ju indo bojou ido gadi sis mundulxo, “Nyi ula ayaxjal, udud teiya sax.”

³⁷ Yesus Pita, Jems xo ido aubi kanangge Jon indoi adu soxyax munjurulxo. Suma kumogx kornjulxo.

³⁸ Andug mosne Ju indo bojou ido gadi ido urumbe deoubxo. Yesus sumaxangglixja song haro xiliyai soubxo nenxabe xox njulxo.

³⁹ Ne adu urum maglib mosne munjurulxo, “Nyingga pinxax song haro xiliyai yisxa? Xelag wa adu mejalx na. Adu wilayuxsax.”

⁴⁰ Nedine sumaxangglixja adu jaxale youbxo.

Adu andug kumogx xendeinjulane habrexbe deubxo. Sisne adu xelag ido alabi xo anyibi xo suma dagi adu jagar xelag ne wil asilxo sib minjoubxo.

⁴¹ Ne Yesus bargebeb ya barsine mundulxo, “Talita koum!” Ne sam kulu sis mendelxo, “Dindongge kanangge, sa nyi sis mumbrixama, tinga!”

⁴² Gasanx dindongge ne tingasine xensi kwalilox (pinax xa adu yar 12 dili). Gasanx andug pudox hali asine pari tunggulnjulxo.

⁴³ Yesus koko sam hail munjrulxo mangau dexone suma dagi munjrajjal. Sisne Yesus dindongge kanangge ne pin naiyax andug munjrulxo.

6

Nasaret andug Yesus gombor huyoubx.

¹ Yesus adu so ne udisne adu ido tubar kulu Nasaret taunbe minjelxo. Sisne ido sox suma andug adu soxsine minjoubxo.

² Sabat nal dalane adu Ju indo bojou maglib sam publab dis munjrisilxo. Sumaxangglixja lambei adu sam xe sisne andug pudox hali asine sis mendoubxo,

“Suma wa sam wa xabe be pexo? Xele ne adu xabe six ne xele xa? Koxrayiux nenxa adu likong yisx na?”

³ Ga xele, suma wa adu wam ana pinhalel kora tamba. Adu Maria ido ngidibi, ne ido aubi kanangge Jems, Josep, Judas, ne Saimon. Ido naibi kube wanx ga jagar sixamun.” Andug adu xasi pari iro pe soubxo.

⁴ Yesus andug sis munjrulxo, “Propet adu xoub donyam dili. Nedine ido tubar kulu xo ido malanggu xo ido urumx adu asreisi gugaring sixa.”

⁵ Adu likong be nenxabe babdaxaman. Gempa sumaxangglixjax kujekujexya nenxabe adun barnjulane andug beli ayoubxo.

⁶ Sumaxangglixja andug Yesus xasi udud tei pejalx, nenxasi adu andug xasi pudox hali alox.

Yesus ido 12 sox suma sonjulxo.

Sisne Yesus tubar keredis xensi mosne Xotei ido sam ne xele hunjisilxo.

⁷ Yesus adu ido sox suma manjulane adu sib lebane andug mundor hali xendeiyax bail hunjisne lililx sonjulane andug minjoubxo.

⁸⁻⁹ Wa ido manam sam munjrulxo, “Nyingga pinhalel be pepex jagar minjaxjal. Ne bred, kegle, moni, siot soux be paxjal. Nedine inggo dumbun xo sendelx neiya pepex minjax.

¹⁰ Nyingga urum beb mos nenx sax. Bunge nyingga taun udis minjaxasi urum ne hagdax.

11 Ne tubar be nyingga gagrenggijalx ko nyingga sam xe hanggijal xandene, nyingga tubar ne udaxasine inggo kwesangbe tumberum ne, nenxabe taursine minjax. Siybane indo ugel palag dux babadox.”

12 Andug mos sumaxanglixjax bulsi Xotei sib minjaxasi sam publab dis minjri soubxo.

13 Sisne andug mundor hali lambei xendei hunjisne suma gembaxone goreng agub per hunjixanden andug gamba pong dinjisilxo.

Jon Baptais ne adu miyalxo.

14 Yesus ido donyam suma xe ayoubxo sisne King Herot adu mangau xa dalxo nenx ido sam ne xiyalxo. Suma dagi andug sis mendoubxo, “Adu Jon Baptais ne aib tingayux. Nenxa adu likong bail adu xabe six na nenxa adu kinggal bail desx na.”

15 Nedine suma dagi andug sis mendesxa, “Adu Elaija.” Dagi mendesxa, “Adu propet nomi morengx ned.”

16 Nedine Herot adu ne xesne mendelxo, “Adu Jon suma ye san adu xoxli toxour dudane miyalxo ne tingayux.”

17-18 Herot aubi kanangge Pilip ido ngobi Herodias pes ido ngobi alox. Nenxa Jon ana King Herot mundulxo, “Nyi ino au ido ngobi ne pemex ne nyi ugelmonxo.” Nenxasi Herot adu suma garingnjulane andug Jon tindengsine xaxoisi talu halib pidoubxo.

19-20 Herot adu xe Jon adu suma tenenemx ne kanin suma, nenxa adu Jon xasi ulaasine xumarsilxo. Herot adu Jon ido sam xiyaxasine adu udud lambei palxo. Siylane adu Jon ido sam xiyax udud tingasilxo. Nedine Pilip ido ngobi Herodias adu Jon xasi iro xiliyai pesne Jon taxas medaxsi, nedine adu siyax kerejal.

21 Bunge Herodias adu nal beli xoxlox, ne King Herot adu hesam xiliyai ido anyibin palxo nal nenxabe babdulxo. Hesam nenxa Galili distrik ido gavman gadi naman naman xo xuber suma indo gadi naman xo Galili distrik indo gadi namanx andug hesam nenxabe soubx.

22 Herodias ido asibi maglib lesne kwanyinglox. Herot xo gadi naman naman Herodias ido asibi xasi pari belinjulxo.

Herot dindongge ne mundulxo, “Sa inarbemane pinxa nyi mendedxm, ne sa hambedxm.”

23 Silane adu ido sam bail disne mendelxo, “Pinxa toto nyi sa inarbedxm ne sa nyi pinhalel kumogx hajo kingdom xabe sixne kwadebx nyi hambedxm.”

24 Herodias ido asibi mosne ido anyibi inarlox, “Sa pinxa xasi inar da?” Anyibi sis mundulxo, “Jon Baptais ido gadi.”

25 Silane Herodias asibi gasanx aib king sib mosne mundulxo, “Sa hamehamegya Jon Baptais nenx ido gadi tuberbeb persi habe!”

26 Ne king adu sam ne xesne adu pari xurang xiliyai palxo. Nedine gadi naman naman lesne hesam maglib soubx ne ido sam bail dulxo nenxasi adu ido asibi sam xendeiyax kerejal.

27 Sisne king ana ido xajax gadi suma gasanx soilane mosne Jon ido gadi pes lax mundulxo. Jon talu halib silane adu mosne Jon ido xoxli toxour disne,

28 gadi tuber hogsi pes lelxo. Siylane adu dindongge ne huyulane, adun pesne ido anyibi huyulxo.

29 Jon ido sox suma xe sis lesne Jon ido gubol pes mosne sub duma dinggini korax nenxabe pidoubxo.

Yesus 5,000 suma pin nanjulxo.

³⁰ Yesus ido sox suma andug aib lesne xulyoubxo. Sisne andug kinggal xa xo xelesamx hunjisoubxo ne Yesus mundoubxo.

³¹ Nenxabe sumaxangglíxja lambei mo le asoubxo ne nal nenxabe adu ido sox suma jagar pin heax kerejal. Silane adu andug munjrulxo, "Aria, nyingga inggoiya sa jagar mos so der beb xarpideba."

³² Sisne andug indoíya kubungbe sam so derbe minjoubxo.

³³ Nedine suma lambei andug so ne mo soubxo ne xoxnjoubxo, ne andug kwesang ana babaxeingsi taun kumog keredis sam minjax so ne nomiasi minjoubxo.

³⁴ Yesus adu kubung yag koro xoub desne xoxlox ne sumaxangglíxja lambeiyai soubxo. Adu xoxnjulxone sisne andug sipsip xumar suma xujalx ne pala, nenxa adu andug xasi pari xuranglox. Sisne adu kuluisi pinhalel lambei xasi xeles sam hunjisilxo.

³⁵ Seng kulolane Yesus ido sox suma adu sib lesne mundoubxo, "Ga so der be sixamun ne seng kulax korax na.

³⁶ Nyi sumaxangglíxja sonjuma tubar dagi kuluba urum keredis nenxabe monane indo indoíya pin hwaabira."

³⁷ Nedine adu andug sam ongnjis munjrulxo, "Nyinggan andug pin hunjax." Silane andug adu mundoubxo, "Xehei, sumaxangglíxja

lambeiyai sixa! Sisne 200 moni silba bred hoaasine hunjax kerejal!"*

³⁸ Silane adu andug inarnjulxo, "Nyingga bred gelunggun six na? Nyingga mosne xoxba." Andug xoxsine adu mundoubxo, "Bred 5 xo xumam lilxo."

³⁹ Sisne Yesus sumaxangglíxja kumogx xunggur dide dide njisne xaxare kexeibe njanjanyax munjrulxo.

⁴⁰ Silane andug xunggur dagi 100, dagi 50, sisne andug njanjan ayoubxo.

⁴¹ Sisne Yesus bred 5 xo xumam lilxo pesne lang bugbe xoxsine Xotei kai huyisne bred ne gogobuisi ido sox suma hunjulane andug ana dodoisine sumaxangglíxja hunjoubxo. Adun xumam lilxo dide gogobuisi sumaxangglíxja kumogx pilagnjis hunjulxo.

⁴² Sumaxangglíxja kumogx andug hesne kere ayoubxo.

⁴³ Ne pin hedu kumogx silane sox sumana gereisine pin kegle 12 hogax suxne silxo.

⁴⁴ Suma nenxabe pin heoubx ne 5,000.†

Yesus yag usub xandelxo.

⁴⁵ Nal nenxya gasan dis Yesus ido sox suma kubung maglib mosne nomiasi Betsaida taunbe yag inggamx ne minjax munjrulxo. Sis idoi sax nenxasi adu xunggur xendeinjulxo.

⁴⁶ Adu sumaxangglíxja sonjisne adu geinayaxasi tombu xolxo.

⁴⁷ Bula alane kubung yag koro mbelembe nenx silxo. Ne Yesus idoiya aib nenx silxo.

⁴⁸ Yesus xoxnjulx ne tumur ana kubung bijailane ido sox suma kubung pes yag inggamxa minjax hanggar soubxo. Sisne kogli hali Yesus yag usub xensi andug sib mo silxo. Adu andug yelunjax silane

⁴⁹ ido sox suma adu yag usub sam xen silane xoxyoubxo. Ne andug xox sisne adu mundor halio si youbxo. Andug ula ulaisine haroiyoubxo.

⁵⁰ Andug kumogx adu xoxsine ula haliyoubxo.

* **6:37** Moni silba ne Grik suma sis mendesxa de denariai, ne 200 denariai ne fortnait 16 pala.

† **6:44** Andug xangglíxja xo xelagx wasanjjal.

Nedine gasanx adu andug munjrulxo, “Nyingga teiya sax. Wa sa. Nyingga ula ayaxjal.”

⁵¹ Sisne adu kubung alumasi andug jagar silxo, ne tumur ayoxasi so pong dulxo. Andug pudox hali aiyoubxo.

⁵² Andug pari hog silxo. Nenxa andug sumaxangglixja bred dodoisi hunjisilxo ido kulu ne andug udud pongnijjal.

⁵³ Yesus ido sox suma jagar kubung pesne yag inggamx Genesaret so nenx desne kubung sel nding youbxo.

⁵⁴ Ne andug kubung udisne habrexbe deubane, sumaxangglixja Yesus pala xoxsine gasanx pongnjulxo.

⁵⁵ Andug paripariasi so kumogx keredisne sumaxangglixjax gamba gembaxo ne baxalub persoubxo. Persine Yesus xabex silxone minjoubxo.

⁵⁶ Sis so xa adu silxone andug gamba sumaxangglixja gagrenjisne mo soubxo. Yesus tubar maglib ko taunbe ko taun habrexbe ne andug gamba sumaxangglixja so hobox be gagrenji soubxo. Andug ana adu gwarisi inar soubxo sis andug adu bugax aju ne kundung dixandenane indo gamba ayox asilxo.

7

Xotei ido manam ne amsax indo sam yeluyiux.

¹ Parisi xo manam sam ido xeke suma dagi andug Jerusalem udisne Yesus sib leoubxo.*

² Andug Yesus ido sox suma dagi xoxnjoubxo ne andug barge soxor dili pin hesoubxo.

³ (Parisi xo Ju kumogx andug indo amsax mangau ne soxsi bar yang uradisne andug pin hesxa.

⁴ Sisne Parisi meleng kere maketbe mon lenane andug bar yang uradis bunge andug pin hesxa. Andug indo amsax mangau dagi ne soxsine gamba xo wob xo tuber xo baxalux yang asixa.)

⁵ Parisi xo manam sam ido xeke suma dagi andug Yesus inar youbxo, “Pinax ino sox suma ne andug ga hago amsax indo mangau ne soxjal xa? Andug pin heax bar yang ajalxa.”

⁶ Silane adun munjrulxo, “Propet Aisaia adu heny sam nyingga xasi toto mendelxo. Nyingga jager suma sixa. Adu inggeng siylox, ‘Suma wa hajo donyam indo mob ana ya soxor sixa.

Nedine andug indo xabu pari xalam sa xabe sijalxna.

⁷ Andug sa xalong bisxane xabujal.

Andug suma dagi udud soxsine suma xeke hunjisxa.’

⁸ Nyingga Xotei ido manam sam soxjalxane nyingga amsax indo udud dagi manam sox sixa.”

⁹ Sisne adu andug sis munjrulxo, “Nyingga Xotei sam asreisine inggo amsax mangau soxsi sax ne xeke tangxo.

¹⁰ Moses sis mendelxo, ‘Ino ala xo amax xasi haliy ayax,’[†] ne ‘Suma ye adu ala ko ama ko nyamang hunjudxo, ne adu miyadxo.’[‡]

¹¹ Nedine suma be adu ido alabi xo anyibix munjrudxo, ‘Sa nyisxa toromgaxaman. Pinax nyisxa toromgax ne sa Xotei huyax mara xuradomonxo.’

* **7:1** Parisi suma lola urum maglib soubxo, ne Sadyusi dide maglib soubxo. Andug datara asixa. Parisi indo mangau ne sux, sasaya mangau ne six. Andug sumaxangglixja dagi kornjisne andug yax yisxa. Nenxa Yesus andug sam bail munjrulxo. [†] **7:10** Kisim Bek 20:12; Lo 5:16 sam kulu sux nedi. [‡] **7:10** Wok Pris 20:9 sam kulu sux nedi.

¹² Nenxa nyingga Parisi inggo mangau ne sux suma be ne adu alabi xo anyibix pinhalel be toromnjaxaman.

¹³ Sisne nyingga inggo amsax indo mangau ne tidor si sox sixane nyingga Xotei sam gugaring sixa. Ne nyingga mangau ne mangau dagi sis yisxa." Yesus adun sis munjrulxo.

Yesus adu mendelxo, pinxan suma alulsinjixna.

¹⁴ Yesus bili sumaxangglijja manjis lex mulabane munjrulxo, "Nyingga kumogx sa sam xesne pongnggemin.

¹⁵⁻¹⁶ Pinhalel kumogx habrexbe sam suma maglib kolsine suma soxor huyijal. Nedine pinhalel kumogx suma maglib sam desx ne Xotei nyambe suma soxor huyisx."

¹⁷ Bunge Yesus sumaxangglijja xunggur ne udnjisne urum maglib minjelane ido sox suma andug yaulsam xa mendelxo nenxasi adu inaryoubxo.

¹⁸ Yesus andug sis munjrulxo, "Nyingga yaulsam ne pongnggijal e? Pinxa nyingga hesxa nedana nyingga soxor hanggax kerejal.

¹⁹ Pinxa ne adu kweb maglib kolsix ne adu biasi desx. Ne adu ino pari maglib koljal." (Yesus adu nenx mende siylox, ne hepin kumogx ne soxor xujalxo.)

²⁰ Sisne Yesus aib bili mendelxo, "Ne pin suma maglib sam desx ne Xotei nyambe suma soxor hunjixna.

²¹ Pinxa suma maglib sam desxne soxor huyisne sux, udud hali, huyeman manggau, yuwem, suma taxa,

²² suma be ngobi yei yixam, hali tambi, mangau hali kumogx, jager mangau yisxa, huyeman udud, waxar mangau, gomborbe sam, da dangga, xo nanar mangau.

²³ Mangau hali kumogxo ne suma maglib sam desx ne Xotei nyambe suma soxor hunjix." Yesus adun sis munjrulxo.

Ponisia xanggli ido udud tei

²⁴ Sisne Yesus adu tingasi so ne udisne mo siti Tair indo sob desne adu urum magli beb minjelxo. Adu nenx simane suma ben adu xeleyaxjal. Nedine adu dide nenxabe holopax kerejal.

²⁵ Adu nenxabe silane xanggli be asibi dukangge, ye adu mundor hali dili ne adu xe sisne gasan lesne Yesus kwesang kulub tomblonglox.

²⁶ Adu Girik xanggli. Siria kantri xo Ponisia sob maglib nenx nyam pidelxo. Adu Yesus mundor hali ido asibi maglib xendeiyax xasi gwarisi inar silxo.

²⁷ Yesus adu sis mundulxo, "Ga mete xelag pin nanjax. Sin ga xelag indo pin ne xasui munda sang ana hedxo ne beli jal."

²⁸ Xanggli adu Yesus ongsine mundulxo, "Aiyama, ne xabu, nedine sang andug baxalu bogagub sixa, ne andug dide xelag indo pinhedu ne heaxbarxo."

²⁹ Silane Yesus adu mundulxo, "Ino sam beli mendemenxo nenxa nyi aib minje. Mundor hali ino janx hagdix uradix."

³⁰ Adu aib ido urumbe minjelxo. Mosne ido asibi xoxlox ne adu baxalub wilasilxo. Ne mundor hali adu hagdulxo.

Yesus suma be dabxajox xo mob kandung ne gereilox.

³¹ Yesus taun Tair so udisne adu mos taun Saidon si desne adu xensi mos Dekapolis Galili yag koro xoub nenx dalxo.

³² Silane suma ne adu dabxajox xo men padinggelxo ne adu sib pe lesne Yesus adun barge usub pidaxasi gwari inar youbexo.

³³ Yesus adu suma ne unggur xoub pes mosne barbug adu dabdingginib pidelxo. Sisne adu barbug mesel si suma ne men kundung dulxo.

³⁴ Yesus mundur bail pesne tarx lang bugbe xoxasine adu suma ne mundulxo, "Epata," ne ido kulu sux, "Hobox aba!"

³⁵ Silane gasan suma ne adu dabdu pong huyisne pin be adu men padinggel udisilxo. Ne xujalx asine adu sam beli mende silxo.

³⁶ Silane Yesus adu mangau xa yisilxo ne adu andug kokonjisne suma be mundax kornjulxo. Yesus aib kokonjis sesebeinjulxo. Nedine andug dide sumaxangglia munjri sebeinjisilxo.

³⁷ Andug sam ne xesne pudox hali asine mendoubxo, "Mangau kumogx adu yisxane beli. Adun siyixandene andug dabxajox ne sam xesxa, mob kandungx ne hobox xasi sam beli mendesxa."

8

Yesus 4,000 sumaxangglia pin nanjulxo.

¹ Nal ne maglib sumaxangglia lambeiyai des aib mul ayoubxo. Sisne andug heax pinbe xujalalox, ne Yesus ido sox suma manjis munjurulxo,

² "Sa sumaxangglia wanx xasi pari xurangbix. Andug sa jagar nal xalubi seberxo nedine andug heax pin xujalxo.

³ Ne andug mamx sixa ne sa andug aib sonjud indo urumbe minjaxabarxo. Ne dagi indo tubar weyexya, sina andug gaman nyam uringnjum ganjang kulaxabarxo."

⁴ Adu ido sox suma aib Yesus mundoubxo, "Ga so rauxbe sixamun nenxa bred xabex pen sumaxangglia nanjaxamun?"

⁵ Adu andug inarnjulxo, "Bred gonggulu gelunggu nyingga dili sixa?" Silane andug Yesus mundoubxo, "7 six."

⁶ Adu sumaxangglia miyanghanggub njanjanyax munjurulxo. Sisne adu bred 7 gonggulu pesne Xotei kai huyulxo. Adu bred gogobuisine ido sox suma hunjulxo. Silane andug pesne sumaxangglia njanjan soubxo dodoi hunjoubxo.

⁷ Adu xumam dudu lilxo dili ne dide pesne Xotei kai huyulxo. Sisne ido sox suma hunjisne dodoiyax munjurulxo.

⁸ Silane sumaxangglia pin ne hesne kwebnjulxo. Bunge ido sox suman pin heduhedu ne gereisine kegle 7 hogax suxne silxo.

⁹ Sumaxangglia kumogx nenx deubx ne 4,000. Silane Yesus aib andug sonjulxo.

¹⁰ Adu ido sox suma jagar kubung maglib pudoxasi woxsine Dalmanuta distrik so ne minjoubxo.

Parisi andug ana Yesus likong yax mundoubxo.

¹¹ Parisi lesne Yesus helahelang youbexo.* Andug adu toum yis lang bugbe siga be yax inar youbexo.

¹² Silane Yesus ido udud maglib pari kulig xiliyai yulane munjrulxo, "Pinxa andug sumaxangglia nal wanxya ido siga usernjax bail haliaborxo? Sa xabu toto nyingga munggrixam, andug siga be xoxyaxabar. Jalxo toto."

* **8:11** Parisi suma lola urum maglib soubxo, ne Sadyusi dide maglib soubxo. Andug data asixa. Parisi indo mangau ne sux, sasaya mangau ne six. Andug sumaxangglia dagi kornjisne andug yax yisxa. Nenxa Yesus andug sam bail munjrisilxo.

13 Sisne adu andug udinjisne aib pudoxasi kubung bugbe woxsine yag koro inggam minjoubxo.

Parisi xo Herod indo yis ido yaulsam.

14 Yesus ido sox suma bred daga peslax lol dunjulx. Andug kubung maglib nenxabe bred gonggulu kujexya dili.

15 Yesus andug xeke sam hunjisne sis mendelxo, "Xoxyax! Nyingga Parisi xo Herod indo yis[†] nenxa xox gereiyax!"

16 Andug sox suma indoi indo sam ne bred xujalxo nenx ulengsi mendoubxo.

17 Yesus adu andug sam xa mendesoubx ne adu xeke ne adu inarnjulxo, "Pinax nyingga sis mendesx ga bred xujalxo? Nyingga ponggijalx e? Nyingga pari hobox xajalx e?"

18 Nyingga nyamge dili nedine nyingga xoxjalx e? Nyingga dabdinggini dili nedine nyingga xejalx e? Ne nyingga lol dinggix e?

19 Sa bred 5 pesne gobudis 5,000 suma hunjumxne nyingga kegle gelunggun bred heduhedu peoubxo e?"

Andug mendoubx, "12."

20 Yesus mendelxo, "Sisne bred 7 sa 4,000 sumaxangglixja asine gogobui yudane kegle gelunggun peoubxo e?"

Ne andug sis mendoubxo, "7."

21 Yesus andug sis munjurulxo, "Nyingga ponggijalx e?"

Yesus Betsaida suma nyam burx be gereilox.

22 Yesus ido sox suma jagar Betsaida tubarbe minjoubx. Silane sumaxangglixja daga suma be nyam burx adu sib pes lesne adu nyam burx ne kundung dax gwarisi inar soubxo.

23 Silane Yesus nyam burx ne bar huyis tubar xoub pes minjelxo. Adu suma ne nyamgeb meselsine bagen kundung dis inarlox, "Nyi pinhalel be xox yixam e?"

24 Nyam burx ne tirarasi ne so xoxsi mendelxo, "Sa sumaxangglixja xoxnjixam, nedine andug wam pala ola sixa."

25 Silane Yesus aib ido barge suma ne nyamgeb pidelane nyamge hoboxasine jaxal alane pinhalel kumogx xox belilox.

26 Silane Yesus adu urumbe soi si mundulxo, "Nyi tubar maglib minjaxjal."

Yesus suma ye ne Pitan bab dis mendelxo.

27 Yesus ido sox suma jagar tubar daga Sisaria Pilipai taun kulub nenx mo soubxo. Andug xensi wox sibane Yesus andug inarnjulxo, "Sumaxangglixja andug sa xasi ye toto e?"

28 Ne andug adu sis mendoubxo, "Dagi mendesxa nyi Jon Baptais, daga mendesxa nyi Elaija, sisne daga nyi xasi mendesxa nyi propet be nomi silxo."

29 Silane adu andug inarnjulxo, "Ne nyingga sa xasi ye toto e?"

Pita mendelxo, "Nyi Kristus."[‡]

30 Nedine Yesus kokonjis munjurulxo, "Nenxa nyingga sa xasi suma be mundaxjal."

Yesus ido mes xuduadox nenxa ido sox suma munjurulxo.

[†] 8:15 Yis sam ne ido kulu ne Parisi xo Herodx indo mangau hali hali kumogxo nenxasi yaul sam munjurulxo. [‡] 8:29 Kristus ne Hibru mendesxa Mesaia.

³¹ Sisne Yesus ido sox suma sis galinjulxo, “Suma ido Ngidibi xurang xo kulig lambei pamin. Adu Ju indo gadi xo lola urum gadi naman xo manam sam ido xele suma andug ana ais yaxabarxo. Adu taxaleb miyadxo. Nal xalubi udin adu aib mesob inggam tingadox.”

³² Adu sam ne pong toto ido sox suma munjurulxo. Silane Pita adu pes xoub mosne kuluisi nyamang huyulxo.

³³ Silane Yesus bulsi ido sox suma xoxnjisne Pita nyamang huyis mendelxo, “Satan, nyi sa gomborbe minje! Nyi Xotei ido udud pejalxam. Nedine nyi suma ido udud pesxam.”

³⁴ Sisne Yesus sumaxanglixja xo ido sox suma manjulane adu sib leubane munjurulxo, “Sumaxanglixja ye adu sa soxbax sine haliy asine kulig kumogx kubaisine sa soxbax.

³⁵ Sisne suma ye adu idoi ido xunun xumar sidxone adu ido xunun ne yuwamadox, nedine suma ye adu sa xo Xotei ido sam beli xasi xunun ududx ne adu ido xunun adu si ilongadox.

³⁶ Ne suma be adu miyang wanxabe pinhalel kumogx pena sidxone adu ido xunun ne yuwamadox, pinxa beli adu xabe nenx dadxo e?

³⁷ Ne suma be adu pinxana ido xunun hwa ana aib padxo?

³⁸ Hamegxa nal wa sumaxanglixja dagi Xotei gombor huyis ne mangau hali dide didei yisxa. Nensexasi sumaxanglixja ye sa xo hajo sam xasi domeisixne Suma ido Ngidibi adu ido Alabi uring xiliyai sinane Xotei ido kanin sombu jagar yogolodox ne adu dide andug xasi domeidox.”

9

¹ Silane Yesus andug sis munjurulxo, “Sa nyingga xabu munggredxm, sumaxanglixja dagi maglib wanxabe sixane andug mejal sibane Xotei ido kingdom bail dili damane andug xoxyaxabarxo.”

Yesus ido dodamug xox kulube alox.

² Bunge nal 6 udisne Yesus, Pita, Jems, Jonx gagrenjis gabra bugbex woxsine andug ya nenx soubxo. Silane nenxabe Yesus ido dodamug bulsine xox kulube ala andug xox youbxo.

³ Ido bugax pinhalel ne bulsi xapoisine andosom giligilingsine nyam helxo. Miyang wanxabe suma ben bugax sux yang ama apoiyax kerejal.

⁴ Elaija xo Moses nenx desne Yesus jagar sam asoubane sox sumana andug xoxnjoubxo.

⁵ Pita adu Yesus mundulxo, “Inggreng Suma, ga wanxabe sixamun ne beli, nenxa ga sox suma gesu xalubi huyaxmun, be ino gesu, be Moses ido, be Elaija ido.”

⁶ Sox suma andug ula xiliyai youbx nenxa Pita adu sam xa mendedox ne adu lol.

⁷ Silane arom be lesne andug hamugnjulane xarom maglib inggam sam be dalxo, “Wa hajo du. Sa adu xasine paribeli xiliyai six. Nyingga adu sam xe huyisax!”

⁸ Ne gasanx sox suma andug xoxayoubxo ne suma dagi xoxnjijal. Yesus idoi ya andug jagar silxo.

⁹ Andug gabra udis yogol sabane Yesus adu ido sox suma sis kokonjulane andug mangau xa xoxborxo ne suma be mundaxjal, si sibane mox Suma ido Ngidibi men aib xuduadox.

¹⁰ Silane andug indo indo sam ne petangsine andug sam kulu “men aib uduadox” nenxa uleng soubxo.

11 Ne andug Yesus sis inar youbx, "Pinax andug manam sam ido xele suman Elaija nomiasi yogolax mendoubxo?"

12 Yesus aib sis munjurulxo, "Elaija adu nomiasi lemane pinhalel kumogx gereidox. Nedine kulu xax sam wa Suma ido Ngidibi xurang xiliyai pena sidxone andug adu xasi ironjumane gombor huyaxabarxo ne inggremg xabe sis mendexo?"

13 Nedine sa nyingga sis munggrixam, Elaija adu le xuradixo, ne suma indo udud soxsine mangau didedide kumogx adu xabe yiseberxone, ne Xotei ido sam adu xasi inggremgxone six."

Yesus xelag be mundor hali dili ne beli dulxo.

14 Yesus adu sox suma xalubi jagar lex sox suma lagi xoxnjoubx ne andug sumaxangglixja tumbangai maglib nenx kwalinj soubxo. Sisne manam sam ido xele suma jagar sam datera asoubxo.

15 Andug Yesus xox sisne udud brungungasi gasan baxeingasi adu sib mosne pari beli sam mundoubxo.

16 Yesus andug sis inarnjulxo, "Nyingga andug jagar sam xa xasi datera asix a?"

17 Suma be xunggur mbelembe silxone aib Yesus mundulxo, "Inggremg Suma, sa hajo du mundor halin mob kandung dinane sa nyi sib pe lexama.

18 Ido nal dadxo ne adu mundor hali nedana adu petang six. Ne adu miyanghanggub hwi dixandene adu kol paux asine dodamug dangga asix. Adu xalag kulu henane hulex mobdingginib sam desxna. Sa ino sox suma mundor hali xendeiyax inarnjumonxo ne andug kerejal."

19 Yesus adu sis mendelxo, "Nyingga sumaxangglixja, nyingga xabu udud tei xujalxo. Nal gelunggun sa nyingga jagar semenxo? Nal gelunggun sa nyingga inggo kulig kubai semenxo? Suma xelag ne sa sib pes leb."

20 Silane andug adu sib pe lebane mundor hali ne Yesus xoxsisne adu xelag ne gasan kakarasine kol miyanghanggub pauxasine mobdingginib sam hulex desne adu miyanghanggub ginggongalox.

21 Yesus xelag ne ido alabi inarlox, "Nal gelunggun adu si silxo?"

Silane adu mendelxo, "Xelag halib inggam sam lesne hamegx.

22 Nal lambeb mundor hali nedana adu medax xasi ne balax xo yag korob hwidisilxo. Nenxa nyi mangau be yax kere xandene ga xasi pari xurangmbi xandene ga toromgem?"

23 Yesus adu mendelxo, "Pinax nyi sis mendexam, 'Nyin ne yax kere e?' Ye adu sa xasi xabu ud tei dili ne pinhalel kumogx yax kere."

24 Silane xelag ne ido alabi gasan xoeng asine mendelxo, "Sa xabu ud tei dili, nedine sa hajoya xabu ud tei ne nyina toromane xiliyai yax!"

25 Yesus adu sumaxangglixja unggur xoxnjulxone andug nenxabe babaxeingsi lesoubxo. Silane adu mundor hali ne korsi mundulxo, "Nyi mundor hali mob kandung xo dabxajox, sa nyi kokombixam nyi xelag wa hagdis aib adu maglib minjaxjal."

26 Silane mundor hali ne ngirengsine adu xelag ne bijai tangsi hagdis minjelxo. Silane xelag ne andosom me palai lox. Silane andug lagi mendoubx, "Adu mexo."

27 Nedine Yesus adu bar koib pesne soxorlane adu tingalox.

28 Nal nenxabe Yesus urum maglib minjelane sox suma andug adu yobu inar youbxo, "Kulu xax ga mundor hali ne xendeiyax kerejal?"

29 Adu munjurulxo, "Gein be sam ya mundor hali sux ne xendeidxm."

Yesus bili ido mes xuduadox nenxasi mendelxo.

³⁰⁻³¹ Silane Yesus xo ido sox sumax tubar ne udisne Galili distrik maglib minjoubxo. Yesus ido sox suma manam sam munjrasasi, nenxa adu nenxabe sidxune suma ben adu xelexe aiyaxjal. Adu munjurulxo, "Suma ido Ngidibi suma dagin sosolox bargeb pidebane adu taxan medaxabarxo. Adu me xuradin nal xalubi udinane aib uduadox."

³² Nedine adu ido sam kulu ne andug pongnjijal, sisne andug adu inaryax ula aiyoubx.

Ye adu suma xiliyai toto?

³³ Yesus ido sox suma jagar mos tubar Kapenam si deoubx. Adu urum maglib nenx sisne adu inarnjulx, "Pinax toto nyingga gamanbe inggo inggo sam uleng seberxo?"

³⁴ Nedine andug gamanbe suma ye xiliyai toto nenxasi andug indo indo uleng soubxo, nenxa andug tenenemasi sam be mende xujalxo.

³⁵ Yesus njanasine ido 12 sox suma manjisne munjurulxo, "Suma ye adu nomi aiyax asine adu mete haliy asine kumogx indo kinggal suma sax."

³⁶ Adu xelag dukangge be pesne andug mbelembe tingdis pes lumsine andug munjurulxo,

³⁷ "Suma ye adu sa xasi udasine xelag dukangge sux wa toromdox, ne adu sa torombisxna. Ne ye adu sa torombisne adu sa neiya torombijalx, adu dide ye sa sobin yoglomonx ne torom yix."

Suma ye ga talagjalx ne hago dubli.

³⁸ Jon Yesus sis mundulxo, "Inggreng Suma! Ga suma be mundor hali ino donyam be sam xendei yulx ne ga xoxmunx. Nedine adu ga jagar kandongajal, nenxa ga adu kormunxo."

³⁹ Yesus mendelxo, "Adu koryaxjal. Suma ye adu sa donyam besam likong yisidxone adu serx sa xasi sam hali mubraxman.

⁴⁰ Ne suma ye ga talagjalx ne hago dubli.

⁴¹ Sa xabu toto munggrixam, nyi Kristus ido suma sixanden, ne suma ye adu nyi gamba yag sa donyam besam hambixanden, ne adu ido hwapin padxo."

Mangau halin udud toum sixna.

⁴² Yesus bili mendelxo, "Sina xelag ye sa xasi ud tei pesx nane suma ben uneb xasuidoxne, Xotei ana mangau hali tenemxo suma nenxabe yudx. Yinane duma gongglu xiliyai xoxlib ndingsi yuwalbe xasui saxne yeluidox.

⁴³⁻⁴⁴ Ino barge bena nyi une pidax udud hambixanden ne nyi toxourdax. Ne beli tenemx nyi barge kujexya jagar si bil xujalx sidxm. Ne hali toto nyi barge lilxo jagar sidxm ne nyi balax aiyox xujalx sob nenx xasuimbem kulodxm.

⁴⁵⁻⁴⁶ Ino kwesang bena nyi une pidax udud hambixanden ne nyi toxourdax. Ne beli tenemx nyi kwesang kujexya jagar si bil xujalx sidxm. Ne hali toto nyi kwesang lilxo jagar sidxm ne nyi balax aiyox xujalx sob nenx xasuimbem kulodxm.

⁴⁷ Ne ino nyamge bena nyi une pidax udud hambixanden ne nyi duduxyax. Ne beli tenemx nyi nyamge kujexya jagar Xotei ido kingdom maglib minjedxm. Ne hali toto nyi nyamge lilxo jagar sidxm ne nyi balax aiyox xujalx sob nenx xasuimbem kulodxm.

⁴⁸ So nenxabe

'sumaxangglixja indo ambil ne moreng ayaxbar,*
ne balax mosu ayaxaman.†

49 Ju indo mangau ne atrai kumogx biyarge pidemane atrai ne Xotei nyambe jaxalaisyax. Nenzasi balax ne Xotei ido sumaxangglixja kumogx xabe dadxone andug Xotei nyambe jaxalaisyax.

50 Biyar adu beli. Nedine biyar ido kwaxeing aiyox xanden ne nyingga koxoraibane aib kwaxeing dili adox? Nyingga biyar ido kwaxeing pala saxabarxone inggo inggo jagar pari osolox sax." Yesus adun sis munjrulxo.

10

Kandong toxour dixax.

1 Yesus Kapenam so udisne Judia distrik indo so maglib minjelxo sis burbardis Jodan yag xoub minjoubxo. Aib bili suma xijirayai adu sib leubxo, sis ido mangau ne andug xelexe hunjisilxo.

2 Parisi dagi les ne adu inar be sam toum youbxo, "Manam sam sis mendexo suma adu ngobix kandong toxour yax kere?"*

3 Adu aib mendelxo, "Pinxa Moses ana kokonggelxo?"

4 Andug mendoubxo, "Moses adu suma ongnjixo ne suma adu wamoi be inggreng ana xanggli huyudxo. Xanggli huyinane kandong toxourdin xendeima minjedxo."

5 Yesus aib mendelxo, "Nyingga jajan tamba nenzax Moses manam ne inggrengasi hanggelxo."

6 Nyingga xiyaba. Nomi tenemx Xotei pinhalel kumogx koraxalox. Adu 'suma xo xangglixjax koranjulxo ne andug suma ayoubxo ne andug xanggli ayoubxo.†

7 'Kulu nenzax suma adu alabi xo anyibixo udinjinane ido ngobi digi pag ana saxlul.

8 Sux nenzax asux lilx ne dodamug kujex aiyaxlul.‡ Nenzax asux lilxo si jalx, asux kujex.

9 Nenzax Xotei ana turdinjiux ne suma adu toxourdax kerejal."

10 Andug urum maglib sisne sox suma Yesus sam nenzax inar siyoubxo.

11 Adu mendelxo, "Suma ye adu ngobi udina xanggli be padxo ne suma ne adu ngobi huyeman mangau yixna."

12 Suxne xanggli ye adu gumblixi udina suma be padxo ne xanggli ne adu gumblixi huyeman mangau yixna."

Andug xelag dudu pes Yesus sib leoubxo.

13 Sumaxangglixja dagi indo xelag dudu pes Yesus sib leb kundung dinjaxasi, nedine sox suma andug nyamang hunjoubxo.

14 Nedine Yesus adu xox sisne adu agraglox. Adu sis munjrulxo, "Hagdunjub xelag dudu sa sib leba sis andug kornjaxjal. Xotei ido kingdom ne sux nenzax indo."

15 Sa xabu toto munggrixama, sumaxangglixja xelag wa pala yaxabarxo ne Xotei ido kingdom ne andug ya paxbarxo."

* 9:48 So nenzaxe sumaxangglixja agub ambil ne moreng yaxabarx. † 9:48 Aisaia 66:24 sam kulu sux nedi. * 10:2 Parisi suma lola urum maglib soubxo, ne Sadyusi dide maglib soubxo. Andug datara asixa. Parisi indo mangau ne sux, sasaya mangau ne six. Andug sumaxangglixja dagi kornjisne andug yax yixxa. Nenzax Yesus andug sam bail munjrulxo. † 10:6 Kulu (Buk Stat) 1:27 sam kulu sux nedi. ‡ 10:8 Kulu (Buk Stat) 2:24 sam kulu sux nedi.

16 Sisne adu xelag lumnjisne ido barge usub persine nyoblo hunjisilxo.

Yere suma be Yesus jagar sam alox.

17 Nal nenxa Yesus adu xensi minjax silane suma be baxeingasi adu sib lesne adu parib tomlonglox. Adu inarlox, "Inggreng Suma beli, pinxa toto sa sox na kexei pen sina sidxm a?"

18 Yesus mundulxo, "Pinax nyi sa beli mubrixama? Xotei idoiya beli.

19 Nyi manam sam xele: 'Suma taxlaxjal, suma be ngobi yeiyaxjal, yuwemyaxjal, jager xatusam mendaxjal, jagerasi pinhalel paxjal, ino ala xo ama bogagub sax.' "§

20 Adu Yesus mundulxo, "Inggreng Suma, manam sam kumogxo ne sa xelag halib soxmonxo."

21 Yesus adu xoxsine adu xasi pari beli lox ne adu mendelxo, "Pin kujex nyi gambisxna. Nyi mos, pinhalel kumog so asine, moni yeibra sumaxanggljixa hunjax. Nyi simane nyi Heven sob yereadxm. Ne nyi les sa soxbe."

22 Suma ne yere xiliyai dili, nenxa adu pala persine adu pari xurang pes minjelxo.

23 Yesus xoxnjisne sox suma munjurulxo, "Suma pinhalel yere xone adu Xotei ido kingdom maglib minjax hanggardox!"

24 Ne sox suma andug sam nenxasi pudox hali ayoubxo. Nedine Yesus aib munjurulxo, "Du kube, Xotei ido kingdom maglib minjax hanggar xosix!"

25 Kamel nidel bodo maglib minjax ne hanggarx. Nedine yere sumaxanggljixa Xotei ido kingdom maglib minjax ne hanggar tenemxo."

26 Ido sox suma pudox hali xiliyai youbxo sisne indoi indoi mbelembe sax sam asoubxo, "Ne ye toto kagonjudxo?"

27 Yesus andug xoxnjisne mendelxo, "Suman pin ne yaxman, nedine Xotei ana kere. Xotei ana pinhalel kumogx yax kere."

28 Pita adu mundulxo, "Xoxyu! Ga pinhalel kumogx udisne soxmbaxmun!"

29 Yesus mendelxo, "San nyingga xabu munggredxm, sumaxanggljixa kumogx ana sa xo kanin samx xasi tubar kulu udin ko aubi ko naibi ko anyibi ko alabi ko xelagi ko yu ko udnjudxne

30 adu hameg miyang wanx 100 padxo. Sumaxanggljixa ye adu urum, aubikube, naibikube, anyibikube, xelag, yu padxo. Ne dide suma dagin andug alul yaxabarxo. Sinane nal bunge dadxone andug kexei sina saxabarxo.

31 Nedine sumaxanggljixa lambeiyai nomi aborxo ne andug bunge aiyaxbarxo. Sisne andug ye bunge aborxo ne nomi aiyaxbarxo." Yesus adun sis munjrlxo.

Yesus aib ido me xasi mende xalubi dulxo.

32 Yesus ido sox suma jagar andug Jerusalem taunbe wox sibane Yesus adu nomi alane ido sox suma andug udud lambei peoubxo. Silane sumaxanggljixa andug soxnji soubxo ne ula aiyoubx. Yesus ido 12 sox suma gagrenjis xoub mosne pin xa adu xabe dax ne munjurulxo.

33 Adu mendelxo, "Xiyaba. Ga hameg Jerusalem taunbe xoaxamun. Andug ana Suma ido Ngidibi lola urum gadi naman xo manam sam ido xele sumax indo bargeb pidaxabarxo. Andug adu xasi mendubxo adu

ugel yiux, nenxa adu miyamin. Andug sam taxas adu taxas medinane andug ana adu Jentail indo bargeb pidaxabarxo.*

³⁴ Andug ana adu dome sam mundinane mesel yinane hurixnane taxan medaxabarxo. Nal xalubi udinane adu aib xuduadox." Yesus adun sis munjrulxo.

Jems xo Jon isxo xiliyai sax si inaryoulxo.

³⁵ Sebedi ido ngidibi lilxo, Jems xo ido aubi kanangge Jonx, Yesus sib lesne inar youlxo. Asux sis mendulxo, "Inggreng Suma, yaxayo do pin be xasi inarmbianden nyi pin ne nyi yax hagax."

³⁶ Adu asux inarnjulxo, "Pinxa nyisxa san yi hanggax ud pesxa?"

³⁷ Asux adu mundulxo, "Nal nenxya nyi kingdom maglib gadi sisne yaxa be ino bar belisax be ino bar koinsax be njanayax."

³⁸ Yesus mendelxo, "Nyisxa pinxa xasi inaradox ne nyisxa xe ajalxa. Nyisxa xurang sa padxm ne nyisxa pax kere e? Sa miyadxm ne nyisxa miyax kere e?"

³⁹ Asux ongasine mendulxo, "Yaxa kere."

Yesus asux munjrixo, "Nyisxa sa yag gambab hesxam nenxabe yag henane mangau xa sa yag kungguadxm ne nyisxa kungguyaxlol

⁴⁰ nedine hajo belisxa xo koinsaxbe njanyax ne san mendax kerejal. Njan so ne Xotei ana suma ye ido maraxo nen indo gerei hunjixo."

⁴¹ Nal nenxabe Yesus ido 10 sox suma dagi sam ne xe sisne andug Jems xo Jon xasi agragnjulxo.

⁴² Yesus ido sox suma jagar manjisne munjurulxo, "Nyingga xe, suma andug Jentail indo gadi sixane andug Jentail xumarnjax bail hali asixa. Sisne andug indo suma xiliyai dide suma kumogx andug bogagub persixa.

⁴³ Nedine mangau ne nyingga mbelem saxjal. Suma ye adu suma xiliyai sax xasi, ne adu nyingga inggo kinggal suma sax.

⁴⁴ Suma ye adu nomi xasi sax ne adu suma kumogx indo kinggal suma lolx sax.

⁴⁵ Ne pinax, Suma ido Ngidibi adu dide gan toromya xasi yogoljal. Nedine adu agu ne ga hwagem kexei sax toromgiux. Nensexasi kweing ana miyadox." Yesus adun sis munjrulxo.

Yesus adu suma nyam burx be belidulxo.

⁴⁶ Silane andug lex Jeriko taunbe deoubx. Yesus ne ido sox suma andug sumaxangglixa lexeingai jagar taun udis mosabane suma nyam burx ne gaman xoub njanasine sumaxangglixa moni xasi inarnjisilxo. Ido donyam Batimeus ne ido alabi Timeus.

⁴⁷ Adu xiyalxone Yesus adu Nasaret suma adu le silxo. Adu kuluisi xoeng ayax sisne mendelxo, "Yesus, Devit ido ngidibi, nyi sa xasi pari xurangmbe!"

⁴⁸ Sumaxangglixa xe sisne adu korsine mundubxo, "Nyi tenenemasi si," nedine adu andug sam xe hunjijal. Adu xoeng xiliyai yisne mendelxo, "Devit Ngidibi, nyi sa xasi pari xurangmbax!"

⁴⁹ Yesus tingasine mendelxo, "Adu maiba lemin." Silane andug nyam burx ne maisi mundubxo, "Adun nyi mambix, nenxa nyi pari bailasi tingasine le."

⁵⁰ Silane adu ido dubran bugax ilongai† kabuasi silxo ne xasuilo. Sisne adu gasan tingasine Yesus sib lelxo.

* **10:33** Jentail suma kulu ne Ju jalx. Jentail indo kauntri didei yax. Ne dide andug Abraham ker jalx. † **10:50** Kol siot ne ido kulu ne bugax ilongai agu kumogxo naram asixa nedi.

⁵¹ Yesus adu inarlox, “Ino udud ne sa nyi koxrambedxa?” Silane nyam burx ne Yesus sis mundulxo, “Inggreng Suma, sa xox aiyaxsi.”

⁵² Yesus adu mundulxo, “Nyi minje. Ino udud tei nedana nyi belidxmbixo.” Ne gasanx ido nyamge beliasine adu nyam pidelxo. Silane adu gaman Yesus soxsine minjelxo.

11

Yesus asa gadi sexsi Jerusalem taun maglib minjelxo.

¹ Sisne andug Betpeij xo Betani tubarbe deubxo. Tubar ne Olib ido Gabrab silxo. Tubar ne Jerusalem taun kulub silxo. Nenxabe Yesus ido sox suma lilxo sonjisne

² munjurulxo, “Tubar taxausx ne maglib minjax. Sibane nenxabe dongki ulum nding youbxo nenx six ne xoxyaxbarxo. Ne adu suma ben usub njanajal. Mbereng dis pes wa lax.

³ Ye nyi inarmbixanden, ‘Kulu xa nyi wa yisxam?’ Adu mundax, ‘Aiyaman kinggal huyinane gasan soadox.’”

⁴ Andug mosne dongki ulum gamanbe tingasilane jam mob be nding youbxo, ne tordoubxo. Sis andug mbereng doubxo.

⁵ Suma dagi nenx tinggring soubx ne inarnjoubxo, “Nyisxa mangau xa yaxasi dongki mbereng dis xa?”

⁶ Asux sam xa Yesus ana munjurulxo ne mendulxo. Suma andug asux aruwintjab minjoulxo.

⁷ Asux dongki pes les Yesus sib des isxo dubran bugax ilongai pes dongki usub hulax youlane Yesus usub njanalox.

⁸ Sumaxangglixja lambeiyai indo dubran bugax ilongai gamanbe hulax youbxo. Dagi yub mos wam bar toxourdis pes les gamanbe hulax youbxo.

⁹ Sumaxangglixja dagi andug nomi ayoubxo xensi mosne dagi Yesus bunge ayoubxo. Andug haroisi minjoubxo,

“Xotei xalongyax!”*

“Suma adu Aiyama donyambe sam lexo ne Xotei ana adu nyoblo huyudxo!”

¹⁰ “Xotei ana mangau beli asa gadi wanxabe adu ga xumargisidxo. Adu asa gadi hago was Devit ker maglib sam!”

“Xotei Bugbe Toto xalongsi peding dax!”

¹¹ Yesus Jerusalem si dalxo sisne lola urumbe minjelxo. Adu pinhalel kumog xoxsi kwalilox, nedine bula alane adu ido sox suma jagar Betani tubarbe minjoubxo.

Yesus lola urum jijal yulxo.

¹² Nal bexo ne andug Betani tubar udis mos soubxane Yesus adu mamlox.

¹³ Weyexya sam kurap moi dili xoxlox. Adu xaxali dagi six e ne xeleyax minjelxo. Adu mos ne kulub dalxo. Adu xedelalox beli xaxali jalxo, moi ya silxo, ne pinxax kurap ido xaxali nal jal.

¹⁴ Sila adu kurap mundulxo, “Nyi bili ilaxajal. Suma andug nyi heaxbar.” Adu sis mendelane adu ido sox suma sam ne xeoubxo.

¹⁵ Andug Jerusalem taunbe desne Yesus lola urum xoub mosne adu pinhalel hwaasi so asoubx ne xendeinjulxo. Adu suma ye andug moni dapi asoubx nenx indo baxalu bul hunjisne suma ye andug goul so asoubxo indo njan so baxalu ne bul hunjulxo.

* **11:9** Grik sam ne sux “Hosana.” Mak 11:10, Mun (Buk Song) 118:25, Mun (Buk Song) 118.26 sam kulu ne sixa.

16 Adu sumaxangglixja ye pinhalel pes lola urum xoub inggam mo le asoubxo ne kornjulxo.

17 Ne adu andug usernjisne munjurulxo, "Xotei ido inggreng sis mendexo:

'Hajo urum ne kauntri kumogx sumaxangglixja sa xasi geinayax urum.'[†] Nedine nyingga ne yuwem suma ido holopax so olengborxo."[‡]

18 Sumaxangglixja kumog ido sam xesne pudox hali ayoubxo. Nenxa lola urum gadi naman xo manam sam ido xele suma andug Yesus xasi ula ayoubx. Nenxasi andug adu taxaleb miyax gaman xedelayoubx.

19 Kolu alane andug Jerusalem taun habrex deubxo.

Wam kurap lilaalox.

20 Kogli bexo andug xensi mosne andug kurap wam barig kumogx lilaalox ne xox youbxo.

21 Pita udalox ne Yesus mundulxo, "Inggreng Suma, nyi ono! Wam kurap nyina saya soimonx ne adu lila ayiux!"

22 Yesus andug aib sis munjurulxo, "Xotei xasi tei ud pax.

23 Xabu toto sa nyingga munggrixam, suma yena gabra ne mundudxo, 'Nyi tingasi pudoxasi yuwalbe kulo.' Ne adu ud lilx xujalxone ne adu ud tei dili ne adu pin ne adu mendexo ne sin dadxo. Nenxa adu mangau ne toto sin de huyudxo.

24 Nenxa sa nyingga munggrixama, pinxa nyi udud tei xasi geinbe sam inardxm, pin ne nyi padxm.

25-26 Nyi gein kuluiyaxasine nyi suma ben unembixu sixne nyi udamonxo sixam ne nyi suma nen ido une ne xendeiyax. Sidxmne ino Ala Hevenbe sixnane adun nyi dide une xendei hambedxo."

Andug teraasi Yesus inar youbxo.

27 Andug bili aib Jerusalem taun maglib leubane Yesus adu lola urum xoub xen silane lola urum gadi naman xo manam sam ido xele suma xo Ju indo gadix andug adu sib leubxo.

28 Andug adu inar youbx, "Xabexbe bail xo donyam bugbe ne nyi pes mangau yisxam? Ne yen nyi bail hambin nyi mangau yisxam?"

29 Yesus aib munjurulxo, "Sa nyingga inar kujex hanggedxm. Ne sa ongbax, ne siyba sa nyingga munggredxm sa bail xab sam mamangau yisxam.

30 Jon sumaxangglixja yag kunggu dinjisilxo. Mangau ne Hevenbe sam e? Suma xabe sam e? Sa mubreba."

31 Andug indoi indoi sam uleng youbx ne sis mendoubxo, "Ga mendaxmun ne, 'Hevenbe sam,' ko, adun inargedxo, 'Ne pinxax nyingga adu udud tei huyijalx?'

32 Nedine ga sin mendaxmun, 'Suma xabe sam,' ko?" Andug sumaxangglixja andug xasi ula ayoubane ne pinax andug kumogx udud tei ne Jon xabu toto Xotei ido mob suma.

33 Nenxa andug Yesus aib mundubxo, "Ga lol sixamun."

Yesus mendelxo, "Nenxa sa bail xab sam sa mangau yisxam ne nyingga dide munggraxaman."

12

Wam grep besxa suma indo yaul sam.

[†] 11:17 Aisaia 56:7 sam kulu ne sixa. [‡] 11:17 Jeremaia 7:11 sam kulu ne sixa.

¹ Yesus ana lola urum gadi naman xo manam sam ido xe le suma xo Ju indo gadix yaul sam be sam munjurulxo, “Suma be grep yu biyalxo. Sisne adu mek ganggol lox. Adu so be boxololxo ne grep xaxali ido yag pax. Adu ido grep yu sumaryaxasi nenxa baxalxo gesu dili huyulxo. Sisne adu grep yu kinggal suma dagi umaryax hunjulxo ne moni pesne huyaxasi. Adu sisne so dideb weyexya minjelxo.*

² Grep xaxali nal alane ido mara ne paxasi. Nenxa grep yu alabi ido kinggal suma be soilax grep yu kinggal suma sib mosne grep xaxali ido mara andug ana huyaxasi grep yub minjelxo.

³ Nedine andug adu tindeng youbxo. Taxlebane adu barseiya minjelxo.

⁴ Silane adu kinggal suma be bili soilax andug sib minjelxo. Andug suma ne gadib taxas ne mangau yaxjal ne adu xabe youbxo.

⁵ Adu bili be soalox, ne be ne andug ana taxalubxo. Adu bili dagi lambeiyai sonjulxo. Andug dagi hurihurinjoubxo, dagi kiyangnjoubxo.”

⁶ “Adu kujexya so aiyax silx. Ne ido ngidibi, ido parig bum. Adun kumogx ido bitong ne so asine mendelxo, ‘Andug sa du sam sox huyaxbarxo.’

⁷ Nedine grep yu kinggal suma indo indo sam ayoubxo, ‘Wa adu ido alabi sambom padxo. Aria ga taxasne hagoi yu ne pes xumaryax.’

⁸ Nenxa andug adu pes adu taxas me disne adu huidabane grep yu habrexbe dalxo.

⁹ Mangau xa grep yu alabi yudxo? Adu lenane grep yu kinggal suma aluljinane grep yu suma dagi hunjudxo.

¹⁰ Nyingga Xotei sam wa wasa xajalx e?

‘Duma ne urum kora sumana asrei youbxo.

Duma ne adu hamegxa urum bail dax lunggun tingayoxsix.

¹¹ Aiyaman mangau wa yixo.

Nenx ga hago nyamgeb xox ne beli toto.’”† Sam ne Yesus adun sis munjurulxo.

¹² Lola urum gadi naman xo manam sam ido xe le suma xo Ju indo gadix andug xe le Yesus yaul sam andug xasi mendelxo, nenxa andug adu baryax gaman xedelayoubxo. Nedine andug sumaxangglixja unggurasi ulaayoubxo. Nenxa andug adu udis minjoubxo.

Andug Sisa takis huyax e, jalxo e?

¹³ Silane andug Parasi dagi xo Herod ido sox suma dagix Yesus sib sonjoubxo.‡ Andug Yesus ido ugel sam be mende xaimane andug paxasi.

¹⁴ Andug adu sib les mendoubxo, “Inggreng Suma, ga xe le nyi xabu suma. Ne nyi suma xasi ulaajalxam. Nyi xabu sam toto mendesxam. Andug koxraxo ne nyi udnjijalxam. Nedine nyi Xotei ido gaman xabu usernjomonxo. Sisa ido takis hoa aiyax kere e? Kere jal? Ne ga hoayaxamun e hoayaxman?”§

¹⁵ Nedine Yesus andug indo jager sam ne adu xe le. Adu inarnjulxo, “Pinxax nyingga sa toubxixa? Rom indo moni be pes lebane sa xoxda.”

¹⁶ Andug moni pes leubxane adu andug inarnjulxo, “Ye ido pala xo donyamx ne iwad?”

Andug mendoubxo, “Sisa ido.”

* **12:1** Matyu 21:33 sam suxne six. † **12:11** Mun (Buk Song) 118:22, 23 sam suxne six. ‡ **12:13** Parisi suma lola urum maglib soubxo, ne Sadyusi dide maglib soubxo. Andug datara asixa. Parisi indo mangau ne sux, sasaya mangau ne six. Andug sumaxangglixja dagi kornjisne andug yax yisxa. Nenxa Yesus andug sam bail munjrisilxo. § **12:14** Sisa Rom indo asa gadi naman.

17 Sis Yesus andug munjurulxo, "Pinxa Sisa ido ne Sisa huyax. Pinxa Xotei ido ne Xotei huyax."

Ne andug adu xasi pudox hali ayoubxo.

Suma mes udu asixa.

18 Sadyusi mendesxa suma mes aib udu ayax ne jalxo.* Andug adu inar youbxo,

19 "Inggreng Suma, Moses ga xasi inggrengalox ne suma ye aubi mes ne ngobi udulxo ne xelag xujalxo, ne xanggli kobul pes ne ido aubi xasi xelag nyam babdax.

20 Andug aubi kube 7 soubxo. Mulumx xanggli palxo ne xelag xujalx miyalxo.

21 Aubi sox ne xanggli kobul palxo, nedine adu dide xelag xujalx miyalxo. Aubi gomborbe ne dide sux.

22 Andug dide 7 aubi kube xelag nyam babdijal morengayoubxo. Sisne xanggli kobul adu dide sux miyalxo.

23 Men aib uduayaxbarxo nal nenx ye ido ngobi adox? Andug 7 kumogx ido gumbibli aborxo."

24 Yesus munjurulxo, "Nyingga Xotei sam inggreng ne nyingga lolsixa. Nyingga dide Xotei ido bail ne lolsixa. Nenxa nyingga sam ugel sixa.

25 Mes aib udu aiyax nal dadxone andug indo indo kandong ayaxabar. Andug Hevenbe sombu pala saxbarxo.

26 Mes aib udu ayax xasi, nyingga Moses sam inggreng xabe wam segerbe yos uring asilxo ido xatu wasa ajalx? Xatu ne Xotei ana Moses mundulxo, 'Sa Abram ido Xotei, ne Aisak ido Xotei, ne Jakob ido Xotei.†

27 Adu suma mexo indo Xotei jal. Adu suma kexei sixa indo Xotei. Nenxa nyingga andosom ugelborxo."

Xotei ido manam sam xiliyai toto

28 Manam sam ido xele suma be les ne Sadyusi andug Yesus jagar sam datara soubxo ne xiyalxo. Yesus ana andug indo sam ne aib munjurulxo ne adu xiyalxo. Silane adu Yesus inarlox, "Manam sam xa xiliyai toto?"

29 Yesus ana aib munjurulxo, "Manam sam xiliyai tenemx ne xiwad: 'Nyingga Israel xiyax, Xotei Aiyama hago kujexya.

30 Nyingga Aiyama inggo Xotei nenxa inggo pari kumogx, xunun, udud xo bail kumogx do huyi sax.‡

31 Sis ne dide manam sam be ido sox ne xiwad: 'Nyi ino do ned sam ne nyi suma dagi donjisx sax.§ Manam sam kumogx lilx wa yelui xujalx."

32 Adu Yesus sis mundulxo, "Inggreng Suma, nyi ino sam ne milal, xabu toto Xotei kujexya nyi mendexam nedi, nenxa Xotei be xujalxo.

33 Nyingga inggo pari kumogx, udud xo bail kumogx do de sax ne Xotei huyax. Ne nyi ino do ne sam ne nyi suma dagi donjisx sax. Manam lilxo ne atra kumogx yelui six."

34 Yesus adu xiyalxo ne suma ne sam beli aib mendelxo, sila Yesus ana adu mundulxo, "Nyi Xotei ido kingdom weyexya si jalxam." Nenxa suma kumogx Yesus pin be xa inaryax ula youbxo.

Kristus ye ido ngidibi?

* **12:18** Sadyusi suma lola urum maglib soubxo, ne Parisi dide maglib soubxo. Andug datara asixa. Sadyusi indo udud tei ne sux, mex sumaxangglilxa tinggringyax barx. Ne andug sombu xasi dide ud tei ajalxa. † **12:26** Kisim Bek 3:6 sam kulu ne six. ‡ **12:30** Lo 6:4 sam kulu ne six. § **12:31** Wok Pris 19:18 sam kulu ne six.

³⁵ Yesus adu lola urum xoub sam userasine adu inarlox, “Pinxax manam sam ido xeke suman Kristus* adu Devit ido ngidibi ne sis mendesxa?”

³⁶ Devit adu idoi Xotei ido Mundor ana sam publab dulxo, ‘Aiyaman hajo Aiyama mundulxo,
Nyi hajo bar belixsaxbe njanasi simane
san ino kumal suma

ino kwesang bogagub tadanjudxm.’†

³⁷ Devit idoiya ido donyam Aiyama mendelxo. Koxraina adu bili aib ido ngidibi adox?”

Sumaxanglixja unggur xijra adu xesne pari belinjisilxo.

³⁸ Adu user sam munjrulxo, “Manam sam ido xeke suma nyingga nyam pidax. Andug bugax iloilong hogsine olasixane andug suma kumogx maket sob pari beli sam hunjax andug donjixs.

³⁹ Sisne andug Ju indo bojou maglib xo hesam xiliyai xabe andug donyam soxor ya njan so do youbxo.

⁴⁰ Andug xanggli kobul indo urum pera tungnjis peubxo. Andug hambalumasi gein didedide ilong youbxo. Sisxa suma ne hwa pin hali hali paxabarxo.” Yesus adun sis munjrulxo.

Xanggli kobul ido atra pidelxo.

⁴¹ Yesus lola urum xoub atrayax pinhalel pidubx ido so kwadeb njanalox. Sisne adu xijra andug moni pidax sob nenx moni per soubx ne xox silxo. Yere suma tumbangai moni xilixili per soubxo.

⁴² Nedine xanggli kobul pinhalel xujalxo ne adu les moni dudu lilx xasuilo, ido kulig ne toea kujex pidelxo.

⁴³ Yesus ido sox suma manjul adu sib minjoubane adu mendelxo, “Sa xabu munggrixam, xanggli kobul wa adu moni pidixu ne yere suma moni kumogx pidiberxone yeluyixu.

⁴⁴ Andug yerex suma yereasi huyoubxo ne kobul adu yebraasi huyulxo. Ne adu pinhalel kumogx ido xumar yax dili ne huyi kiridulxo.” Yesus adun sis munjrulxo.

13

Yesus nal benggri ido siga mendelxo.

¹ Yesus sis lola urum xoub udis minjelane ido sox suma be nedana mundulxo, “Inggreng Suma, xox yu! Duma xilixiliyai xo urum xilixiliyai milamilalai ne!”

² Silane Yesus ana mundulxo, “Nyi urum xilixiliyai ne unyixam e? Dumage kujexya wa be dagi usub saxaman. Andug kumogx hagdunjub kulaxabarxo.”

³ Sis Yesus lola urum kwadeb xabe Olib Gabrab njanasilane Pita, Jems, Jon ne Endru andug adu idoiya toto inar youbxo,

⁴ “Ga mugre, nal xax pinhalel kumogx ne dadxo? Sinane pin xa ido siga nedana pinhalel kumogx des keredax kulubx?”

⁵ Yesus andug munjurulxo, “Xelexelesi sax nedana suma ben jagernggaxaman.

⁶ Sumaxanglixja lambeiyai sa donyam pen len mendaxabarxo, ‘Sa Kristus.’ Sina andug sumaxanglixja lambeiyai jagernjaxabarxo.

* 12:35 Kristus ne Hibu mendesxa Mesaia. † 12:36 Mun (Buk Song) 110:1 sam kulu ne six.

⁷ Nal bexo nyingga xajax xo xajax sam mundor be xes ulaxayaxjal. Pinhalel kulu sux ne dadxo, nedine nal benggri bunge dadxo.

⁸ Kauntri be be jagar ubredxo. Ne asa gadi be suma gagrenjin asa gadi be jagar xubraxabarxo. Sinane tubar dagi sarinja denane gase xiliyai dadxo. Kulig kumogx ne xanggli du paxasi xurang pesx ne pala.

⁹ Nyingga xelexele ayax. Andug ana sin nyingga mejistret bargeb tadangginane pen mon Ju indo bojou be yalamgaxabarxo. Nyingga probins indo gadi xo kauntri indo asa gadix parib tinggring ayaxabarxo ne pinax sa xasi. Nyinggan mendabane andug sa xasi xelexe paxabarxo.

¹⁰ Siymane Xotei ido sam beli ne tubar kumogx keredin nomi din mendaxabarxo.

¹¹ Nal xa nyingga tindenggis ne sam gerei yax o siyxanden nyingga sam be mendax udud tunggulayaxjal. Xotei ido Mundor ana udud xa mendax nal nenxya hanggedxo. Ne inggo udud jal.

¹² Aubin aubi taxas medax sosoloadox. Sinane alabin ngidibi dide siydox. Ngidibi kube tinggring ana alabi xo anyibix kube medinjax suma munjraxabarxo.

¹³ Nyingga sa xasi udud tei pen saxabarxo ne sumaxangglixja kumog nyingga ironjudxo. Nedine nyingga ye ting bail ana mox nal benggri xabe daxabarxo ne Xotei ana gagrenggin kagonggedxo.

¹⁴ Nal xa nyingga xox yax pin hali so alul six ne denane langun sob tingadox.* Suma Xotei sam wasaasine xelexe ayax. Siymane suma ye andug Judia sixane, jarui na gabrab xoaxabarxo.†

¹⁵ Suma ye adu ido urum kundab six ne, adu miyangbe kol na urum maglib mon pinhalel paxman.

¹⁶ Suma ye yub sidx ne adu aib mon ido dubran bugax ilongai paxaman.

¹⁷ Pari xurang xiliyai tenemxndi ne nal nenxabe, xangglixja kweb xo xangglixja xelag wal nanjiswa nenxabe dadxo!

¹⁸⁻¹⁹ Nal ne xurang xiliyai dadxo. Xurang ne kului si Xotei miyanghanggu koraalox nenx kerekere jal len hamegxa, sinane bunge bili kerekere sux ne saxman. Nenxa gein aba pin ne nal ru xabe daxman.

²⁰ Xotei adu nal kumogx ne hogodijal osine, sumaxangglixja kumogx saxabar. Nedine sumaxangglixja yeye ido maranjixu ne indo beli xasi, adu nal ne hogodixo.

²¹ Nal nenxabe sumaxangglixja ben nyingga sin munggedxo, 'Xoxba, Kristus‡ six wad!' ko 'Xox ba, adu weyex six!' Sam ne xe huyax jal.

²² Jager Kristus xo jager Xotei ido mob sumax denane siga xo likongx user ayaxabarxo. Andug Xotei ido sumaxangglixja maraxo ne jagernjaxabarxo nedine andug gagrenjaxbar.

²³ Sa nyingga pinhalel kumogx bunge dadxo nenxasi munggrumxo. Nenxa nyingga xelexeleasi sax.

²⁴ Nal kumogx nenxabe kulig xiliyai ido nal nomi sux dadxo ne bunge, 'seng xalug,

ne xexelem ido uring daxman;

²⁵ Benanggar kumogx lang bugbe ureng ana yoglaxabarxo, sinane lang bugbe pinhalel kumogx renjinyaxabarxo. §

* **13:14** Sob ne adu alul yax ne lola urum maglib six. † **13:14** Sam ne heniy sam buk Daniel 9:27, 11:31, ne 12:11 maglib six. ‡ **13:21** Kristus ne Hibu mendesxa Mesaia. § **13:25** Sam ne Isaiah 13:10 ne 34:4, Joel 2:10, ne Amos 8:9 maglib six.

²⁶ Nal nenxabe sumaxangglijxax Suma ido Ngidibi bail xiliyai xo ido uring milal tenemdi jagar arom maglib sam xoxyaxabarxo.

²⁷ Sin adu ido sombu kinggalnjum mon ido sumaxangglijxa kumogx maraxo, ne so kumogx nenxa gagrenjin unggur dinjaxabarxo. Sin andosomx mon miyanghanggu bil be xo lang ido bil be daxabarxo.

²⁸ Nyingga wam kurab xabe xelexe paxabarxo. Sisi palai nane ido bar ne xosolox anane ido bobug padxo. Nenxabe nyingga xelexe ayaxabarxo seng nal kulubx.

²⁹ Sux ned, nal xa nyingga pinhalel kumogx ne dab xoxnjixane, nyingga xelexe ayax, ne Suma ido Ngidibi kulubx lex, mbourbe dex.

³⁰ Sa xabu nyingga munggrixam, sumaxangglijxa nal wa kexei sibane mangau ne dadxo.

³¹ Lang xo miyanghanggux ayox ayaxalul, nedine hajo sam ayox ayaxman.

Ga nal benggri xo seng nyamx ne ga lol sixamun.

³² Suma be nal nen xo seng nyam ne xelexe, Xotei ido Sombu Hevenbe sixa nen xo ido Ngidibix dide xelexe, nedine Alabi idoi nal ne xelexe.

³³ Nyingga xelexe xoxasi sax! Nyingga lol sixa nal xa xo dadxo.

³⁴ Ne sux, suma be ne adu so udin minjedxo. Adu ido urum udinane ido kinggal suma urum xumaryax ne kuje kujex kinggal gadi didedidei ne yax hunjudxo. Sinane suma be mbour xumaryax mundudxo.

³⁵ Urum alabi adu bulax ko, kolu mbelem ko, muru xoeng asim ko, kogli hali ko aib dadxo ne nyingga lol sixa, nenxa xelexe xelexe sax.

³⁶ Sina adu gasanx len, nyingga wil asib xoxnggedx nenxa.

³⁷ Sam xa sa nyingga munggrumenxo, ne sa sumaxangglijxa kumogx munjrumonxo: 'Xelexe xelexe sax!' Yesu adun sis munjrulxo.

14

Lola urum gadi naman Yesu taxalax xasi sam taxasoubx.

¹ Nal wanxabe, lola urum ido kanin ido mul lilxo laham dadxo. Mul ne ido donyam, Pasova. Mul be ido donyam ne, Bred Yis Xujalxo Ne Ido Ge.* Sisine lola urum gadi naman xo manam ido xelexe sumax andug yobu Yesu tindengsi taxalax nenxasi sam taxasoubxo.

² Andug mendoubxo, "Ju indo mul xiliyai be maglib nenx yaxjal, sina sumaxangglijxax xuber ting daxabarxo."

³ Yesu Betanis sisne suma Saimon nomi hogar gamba dili xo sisoubxo. Ne urum maglib basalub nenx njanasi silxo. Silane xanggli be dumagen nggiling koraxo, ne goreng nad ana koraxo ne hwapin bugbex ido ne pes lelxo. Sisine adu nggiling xobrox disne Yesu gadib xuruxlox.

⁴ Suma dagi jagar soubx ne ironjulane indo indo sis mendoubxo, "Pinaxasi goreng ne alul yix, a?"

⁵ Ne adu so ayox osine 300 silba moni yebra suma hunjax ne pex osine."† Sisine andug ironjul adu ngeser youbxo.

⁶ Yesu mendelxo, "Adu uduba. Pinaxasi nyingga adu kulig huyix, a? Adu sa mangau milalai yibix.

* **14:1** Mul lilxo ne Ju indo amsax Isip se soubxo ne udasi mul ne yisoubxo. Andug Isip se ker mbourbe xoub pidaxabarxo ne Xotei ido sombu indo xelag mulumx kiyangnjaxaman. Sisine Xotei andug ser xensi minjax munrulxo nenxa hamegya Bred Yis Xujalxo ido Ge ne dide yisoubxo. Sam ne Kisim Bek 12 xabe six. † **14:5** Dumage silba ne kujex kujex donyam denariai, ne andug 300 denariai ne yar kujex kujex andug hoapin sux pesxa.

⁷ Yebra suma nal kere nyingga jagar saxabarxo, ne nal xa xo udud tingane toromyax. Nedine sa nal keredin nyingga jagar saxman.

⁸ Adu mangau xa yax kere ne yix. Adu sa dodamug be goreng xurux yix ne, bunge hajo sub kulax ne gerei yix.

⁹ Sa nyingga xabu munggrixam, miyanghanggu kumog wa so xabex be, sam beli wa mendaxabarxo ne, pin xa xanggli wa yixo ne dide mendenane adu udyaxbarxo.”

¹⁰ Silane Judas Iskariot mos lola urum gadi naman sob desne Yesus xasi sosoloasi andug bargeb pidax munjurulxo. Judas Iskariot Yesus ido sox suma 12 maglib nenxabe silxo.

¹¹ Andug sam ne xes pari beliainjulane sam bail dis adu moni huyax mundubxo. Siybane Judas Yesus andug bargeb pidax xasi gaman dagi xedelasilxo.

Yesus ido sox suma jagar bitong pin heubxo.

¹² Bred Yis Xujalxo Ne Ido Ge he nal kuluilox, ne indo mangau ne soxna sipsip ulum pen nal Pasova ne udna atra xayaxbarxo. Yesus sox suma nedana adu inar youbxo, “Nyi so xabe dodombis ne gan mon Pasova ne ido heax pinhalel ne gereiyaxamun?”

¹³ Adu ido sox suma lilxo ne sonjis munjurulxo, “Siti maglib minjax silane suma be yag wob kubai na len nyisax tordingedxo. Ne nyisxa adu soxyax.

¹⁴ Adu urum xa maglib mo xandenane, urum ne ido alabi nyisxan mundax, ‘Inggreng Suman inarayox, “Sa hajo talu magli ne xabex be six, ne sa hajo sox suma jagar Pasova ido pin ne heaxamun?”’

¹⁵ Adun talu magli urum biling lilxo bugbe ne usernggedxo, ne pin heax so xo njan sox gerei xuraxo. Nenxa hago pinhalel nenx gereiyax.”

¹⁶ Sisne ido sox suma lilxo ne siti maglib mosne pin xa Yesus idoi munjurulx ne xox yolxo. Silane asuxa Pasova ido pinhalel ne nenxa gerei youlxo.

¹⁷ Bula alane, Yesus ido sox suma 12 ne jagar nenx deubxo.

¹⁸ Andug baxalub nenxabe njanjanasi pin he sabane, adu mendelxo, “Sa nyingga xabu munggrixam, nyingga maglib nenxa suma ben sa xasi sosolo pidedxo, ne adu sa jagar pin hexx.”

¹⁹ Siylane andug pari ganjulxo. Sisne kujex kujex andug adu mundubxo, “Xabu, sa jal, e?”

²⁰ Adu munjurulxo, “Ne be 12 sox suma maglib nenx, ne ye sa jagar bred tuberbe kundung dixo ned.

²¹ Suma ido Ngidibi udinggedxo, ne ido sam sis adu xasi inggrengxo. Nedine suma ye adu Suma ido Ngidibi xasi sosolo pidedxo ne xurang xiliyai padxo! Adu anyibin perjal osine, ne ido beli.”

²² Andug pin he sabane Yesus bred be pes Xotei kai huyisne gobudulxo sis ido sox suma ne hunjisne munjurulxo, “Wa pab, wa hajo dodamug ido siga.”

²³ Sisne adu wain gamba pes Xotei kai huyis andug hunjulane andug kumogx heubxo.

²⁴ Adu sis munjurulxo, “Wa hajo ker ne asa sam ido siga, ne suma lambei xasi xurux yixam.

²⁵ Sa nyingga xabu munggrixam. Sa bili wain heaxaman ne bunge nal nenx Xotei ido kingdom wain kexei hedxm.”

²⁶ Sisne andug mundi xuradisne habrexbe des Olib Gabrab xoubxo.

Yesus Pita mundulxo, “Mondong nyi sa donyam xaxalangadxm.”

27 Yesus munjurulxo, “Nyingga kumogx udibin jarui yaxabarxo. Ne ido inggreng sux:

‘San sipsip xumar suma taxan medudane sipsip jaruina didedidei yaxabarxo.’[‡]

28 Nedine sa aib tinganane bunge sa nomi ana Galilix minjedxm.”

29 Pita babdulxo, “Sina suma kumogx ganjang kulaxabarxo, nedine sa kujalxo.”

30 Yesus mendelxo, “Sa nyi xabu mumbrixam. Hameg, kolu wanxa, muru sam lilx dijai simane nyi inoi sa donyam xaxalang xalubi dudxm.”

31 Nedine Pita danggaasi mundulxo, “Sina sa nyi jagar miyadxm, nedine sa nyi donyam xaxalang ayaxman.” Silane sox suma kumogx sam kujexya nei mendubxo.

Yesus Getsemani ido gein so

32 Andug so donyam Getsemani mendesxa ne minjubxo, sisne Yesus ana ido sox suma ne munjurulxo, “Wanx njanasi sibane sa mos geinada.”

33 Adu Pita, Jems ne Jon gagrenjisne adu jagar minjubxo, sisne adu nomi pari xurang alulsine pari tunggul lox.

34 Adu sis andug munjurulxo, “Hajo xunun pari xurang ana kabudixo ne adu me bil xabe six. Wanx sis xox asax.”

35 Adu kambuix mosne, adu miyandanggub kol tomblongsine geinalox, ne kereadox ne, nal ne adu yeluidox.

36 Adu mendelxo, “Aba, § Ala, pinhalel kumogx ne nyin yax kere. Nyi kulig wa xendeiyu. Nedine nyi sa udud wa soxyaxjal, nyi ino udud ne soxyax.”

37 Sisne adu aib mox ido sox suma ne tordunjulx ne andug wiwil asoubxo. Adu Pita mundulxo, “Saimon, nyi wilamonx six e? Nyi xawa kujex xox asax kerejal e?”

38 Nyi xoxasi geinasi sax, siymane nyi toum xabe ganjang kulaxaman. Ino xunun adu dodoisix nedine ino dodamug adu xuling ayox six.”

39 Bili adu mosne gein kulu kujex nei yulx.

40 Andug nyam kumbom alulnjulxo. Sisne adu aib puluasi lesne adu bili xoxnjulx ne andug wiwil ana soubxo. Andug adu pinxax mundax ne lolol ayubxo.

41 Adu bili le xalubi disne, adu andug munjurulxo, “Nyingga xarpidiberxo wiwilaborx six e? Ne kere! Xawa ne le xuradixo. Xoxba, Suma ido Ngidibi suma ben sosolo xasi une suma bargeb pidixu.

42 Tingring aba! Ga minjax! Suma sax xasi sosolo ayox ne le xuradixo!”

Judas Yesus kumal suma bargeb pidelxo.

43 Adu sam asilane Judas lelxo. Judas ne ido sox suma 12 maglib silxo. Suma xunggur singger xili ilong xo loblobx pesne adu xasi leubxo, ne lola urum gadi naman xo manam sam ido xelesuma xo Ju indo gadin kinggalnjubxo.

44 Sisne sosolo suma adu Yesus xasi andug jagar siga be gereisi youbxo, “Sa mui yixam ne suma nedi, tindengsi pes xumarsi minjax.”*

45 Judas Yesus sib ndengndengx mosne mundulxo, “Inggreng Suma!” Sisne muilox.

46 Suma Yesus barsine tindeng youbxo.

‡ 14:27 Sekaraia 13:7 xabe sis inggrengalox. § 14:36 Aba ne sam kulu ne ala. Aramaik indo sam “Abba”. * 14:44 Nal nenx, Ju indo mangau ne yis kunyan kulu muyilox.

⁴⁷ Siybane dagi kulubx tinggringasubx ne be singger pesne lola urum gadi naman xiliyai ido kinggal suma be damoib xanjangalox.†

⁴⁸ Yesus mendelxo, “Nyingga singger xili ilong xo loblobx pes sa barbax lexa, ne nyingga uber suma ko yuwem suma be tindengya, e?”

⁴⁹ Nal kumogx sa nyingga jagar lola urum xoub sam beli munggrisoumox, nedine nal nenx nyingga sa tindengbijal. Nedine mangau ne damane Xotei ido sam pidixu ne xabu ayaxasi.”

⁵⁰ Sisne sox suma kumogx adu udisne jarui youbexo.

⁵¹⁻⁵² Xelagu adu pin be hogjal, nedine adu bugax xapox ilong tagsine Yesus soxsilxo. Nal nenx andug adu barbane adu ido bugax udisne bisonggumx baxeingalox.

Yesus Ju indo gadi naman nyambe tingdoubxo.

⁵³ Andug Yesus pes lola urum gadi naman xiliyai ido urumbe minjubxo, siybane lola urum gadi naman xo Ju indo gadi xo manam sam ido xele suma kumogx des tumbang ayoubxo.

⁵⁴ Pita adu weyexya pala soxsi mosne Ju indo bojou gadi xiliyai ido urum xoub ndengndeng minjelxo. Nenx adu xajax suma jagar njanasine adu balax xol silxo.

⁵⁵ Lola urum gadi naman ne Sanhedrin kumogx‡ andug Yesus agub aju be xoxsine andug adu taxas medax xasi, nedine andug aju be tordijal.

⁵⁶ Suma lambeiyai jager sam adu xasi mendubxo, nedine indo sam mendubx ne kulu didedidei.

⁵⁷ Sis dagi tinggring sine jager sam adu sis mundubxo,

⁵⁸ “Ga xeunx ne adu sis mendelxo, ‘Sana suman koraxo lola urum wa alulnane nal xalubi maglib lola urum be koraxadxm ne suman korayaxabar.’”

⁵⁹ Siyoubx nedine indo sam ne kulu didedidei.

⁶⁰ Siylane Ju indo bojou gadi xiliyai andug parib tingasine Yesus inarlox, “Nyi sam be mendaxaman e? Sam wa xa suma sixa wad ana nyi kinyombis mendesxa e?”

⁶¹ Nedine Yesus tenenem ana silxo ne ongnjis sam be munjrijal.

Bili Ju indo bojou gadi xiliyai ana adu inarlox, “Nyi Kristus,§ Suma Xiliyai ga ud sixamun nenx ido Ngidibi e?”

⁶² Yesus mendelxo, “Ne Sa. Ne nyingga xoxyaxbarxo Suma ido Ngidibi Xiliyai Bail Dili bargeb belix sab njan ana Hevenbe xarom maglib sam yoglodxo.”

⁶³ Ju indo bojou gadi xiliyai ido xo hog silxo xo ne bubrax dulxo. Adu mendelxo, “Adu sam ne idoi mendex iwad. Ga suma be adu xabe aju xedelayax bili paxman.

⁶⁴ Nyingga xeberx nedi adu Xotei asreisine awauyixo. Nyingga ud ai sixa?”

Kumogx mendubx adu ugel yixo, nenxa adu miyamin.

⁶⁵ Sisne dagi nomi kuluisi adu meselsine nyamge nding huyubx, sis bar gonggulu dis taxas ne mundubx, “Nyi Xotei ido mob suma ido sam be mende!” Sisne xajax suman adu pes ne taxalubx.

Pita Yesus donyam xaxalangalox.

† 14:47 Jon 18:10 ne wasayax, suma singger palxo ne Pita. ‡ 14:55 Sanhedrin ne adu Ju gadi indo kaunsel. § 14:61 Donyam Kristus ne sux, Xotei ana suma be maraxo ne une suma kumog gagrenjis paxasi. Kristus ne Hibru mendesxa Mesaia.

⁶⁶ Pita urum xoub miyangx be nenx silxo. Silane lola urum gadi naman xiliyai ido kinggal xanggli be lelxo.

⁶⁷ Adu Pita balax xol silxo sisne adu andosomx kulubx mos xox gereilox.

Xanggli ne sis mendelxo, "Nyi dide Yesus Nasaret suma ne jagar soumx."

⁶⁸ Nedine adu xaxalangasi sis mendelxo, "Sa lol sixam. Nyi sam xa mendexam ne sa xelexal." Sisne habrexbe mbour kulub minjelxo.

⁶⁹ Kinggal xanggli ne bili xox lox ne adu nenx silxo. Silane adu bili dagi tinggring asoubx ne munjurulxo, "Suma wa dide indo be."

⁷⁰ Adu bili xaxalang alox.

Kambuix sisi palai sine, dagi kulubx tinggring asubx ned Pita mundubx, "Nyi Galili suma, sisne xabu toto nyi indo suma be."

⁷¹ Adu kuluisi saya sam ne xoengasi sam mendelxo, sisne adu sam bail disne andug munjurulxo, "Suma wanx xasi sam asixane sa lol sixam."

⁷² Gasanx muru xoeng lilx dulxo. Silane Pita Yesus ana sam xa mundulx ne udalox, "Muru xoeng lilx dijai simane nyi sa donyam xaxalang xalubi dudxm." Siylane adu pari tunggulane songalox.

15

Yesus Pailot sib pes minjubxo.

¹ Kogli hali tenemxndi, lola urum gadi naman xo Ju indo gadi xo manam sam ido xele suma xo Sanhedrin kumogx sam bil be desne bail doubx. Andug Yesus ndingsine adu pes Pailot barge pidubxo.

² Pailot adu inarlox, "Nyi Ju indo asa gadi e?"

Yesus adu sis mundulx, "Ex, ne xabu nyina mendexam."

³ Lola urum gadi naman adu pinhalel lambei xasi kinyoi youbxo.

⁴ Sis bili Pailot adu inarlox, "Nyi sam be mendaxaman e? Andug nyi sam lambei kinyombisxane nyi xe jalxam e?"

⁵ Nedine Yesus ongyijal, silane Pailot pudox hali alox.

⁶ Yar keredis Pasova ido nal xabe suma ye talu halib xendeiyaxbarxo. Ne sumaxanglixja kumogx indoiya suma ne mendaxabarxo.

⁷ Suma donyam Barabas o sixxane talu hali maglib silxo. Ne ye adu suma Rom gavman jagar sam datara xunggur ne seger be silxo. Nal be suma xunggur ne andug Rom gavman jagar dataraasi ne suma kiyang ayoubxo.

⁸ Sumaxanglixja xunggurai Pailot sib loxsine mangau xa meleng kere adu yisilxone aib yax inar youbxo.

⁹ Pailot inaralox, "Nyingga san Ju indo asa gadi wa lolx hag duda minjema e?"

¹⁰ Pailot xelex alox lola urum gadi naman andug Yesus xasi tera sam asine adu pes Pailot bargeb pidubxo, nenxa adu sis mendelxo.

¹¹ Nedine lola urum gadi naman xunggur xiliyai udud tingndi hunjisne andug Pailot maisi mundubx, ne Barabas hag disne Yesus hag daxjal.

¹² Pailot andug inarnjulx, "Nyingga Ju indo asa gadi o sis xa. Ne sa adu mangau xa ida?"

¹³ Andug xoeng haro youbxo, "Adu burbarbe kweingdxm miyama!"

¹⁴ Pailot inaralox, "Pinax xasi? Adu mangau hali xa yixo?"

Nedine andug xoeng haro alul youbxo, "Adu burbarbe kweingdxm miyama!"

15 Pailot xunggur xiliyai ne udud gereinji hunjax xasi nenxa Barabas hagdul andug sib minjelxo. Adu Yesus pes xajax suma munjurulane hurix youbexo. Sisne andug burbarbe kweingndax xasi pes xoubx minjoubxo.

Xajax suman Yesus asreisine awau youbexo.

16 Xajax suman Yesus pes gavana ido so ganggolx be ne maglib minjubxo. Sisne xajax suma kumogx manjubane leubxo.

17 Andug bugax purpel be Yesus hog huyoubxo.* Sisne sel jingglang pes turdis ganggongndisne, asa gadi ido hat kora palaisine adu gadib pidubxo.

18 Sisne andug xoengasi awausi mundubxo, "O, Ju indo asa gadi!"

19 Andug aib sebe xasi xangar danggal ana gadib taxas ne mesel soubxo. Sisne andug talaisi kwesang tomblongsine adu donyam pedingndi huyi soubxo.

20 Sisne andug adu awau uradisne andug bugax xo purpel xendeisine ido bugax xo aib pidubx. Silane andug adu pes xoub mosne adu burbarbe kweing daxasi.

Yesus burbarbe kweing doubxo.

21 Suma be ido donyam Saimon taun xoub inggam lesne adu taun maglib minjaxasi. Adu Sairin suma, ne Xaleksanda xo Rupusx isxo alabi. Ne ajax suma dagin adu burbar kubaiyax dangga doubxo.

22 Andug Yesus so Golgota o sis mendesx ane minjubx, donyam ne ido kulu ne sux, Gadi Ngisili ido So.

23 Sisne andug wain wam gag mur jagar bulsine adu huyubx, nedine adu pes hejal.†

24 Sisne andug adu burbarbe kweing doubxo. Sis ido bugax xo paxasi gusxe ayoubxo. Sisne suma be toto adun pin xa ne padxo.

25 9 kilok koglix andug adu burbarbe kweing doubxo.

26 Andug adu kulu xax sam xasi kulig huyubx ne ido inggreng sux, "Ju indo Asa Gadi."

27-28 Andug yuwem suma lilxo Yesus kulub burbarbe kweingdunjubxo, be bar belixsax, be bar koinsax.‡

29 Dagi ye andug adu yeluisine awau sam mundi soubx. Andug indo gadi korengasi ne mende soubx, "Nyi ye nenxa nyi lola urum wa alulsi nal xalubi maglib huyax mendumxo.

30 Nyi inoi ino torom si burbar bugbe sam yoglo!"

31 Lola urum gadi naman xo manam sam ido xelesuma xo dide sam kulu nei indoi mendes ne adu awau soubxo, "Adu dagi toromnjisixu, nedine adu ido toromyax kerejal!

32 Adu Kristus,§ ne Israel indo asa gadi, sidxone adu burbar udin na yoglodxo. Siyma ga unyin na udud tei paxamun!" Sinane yuwem suma lilxo adu jagar kweing ayulx ne asux dide awau yulxo.

Yesus miyalxo.

33 12 kilok so xalug les miyanghanggu kumogx kabudis silx mox 3 kilok bula alox.

* 15:17 Purpel bugax ne egplant pala. † 15:23 Wam gak mur ne marasin pala ne urang ayoxdax.

‡ 15:27-28 Aisaia 53.12 sis mendexo, "Sumaxanggijax adu xoxisine adu une suma pala." Nedine Yesus adu une suma jal. Adu sumaxanglixja gereinjax suma. § 15:32 Kristus ne Hibru mendesxa Mesaia.

³⁴ Sisne 3 kilok Yesus bailx xoengasi sis mendelxo, “Eloi, Eloi, lema sabaktani?” Ido kulu sux, “Hajo Xotei, hajo Xotei, pinax nyi sa udibixam?”*

³⁵ Suma dagi kulubx tinggring asubx ne andug ne xeubx, sisne andug mendubx, “Xiyaba, adu Elaija maisix.”

³⁶ Suma be baxeingasi mos, wain ngakraiyixo spans be yulx, sis danggal be sel pes bugbe persine Yesus huyum heaxasi. Adu mendelxo, “Meté adu udub sim. Ga xoxyax sina Elaijan mbe adu pes miyang be yoglodxo ko jalxo.”

³⁷ Yesus bail xoengasine, adu mundor hungsi miyalxo.

³⁸ Lola urum ido bugax xo xiliyai gadib sam bubraxasi kol kulub desne, kodekodebasi lilx alox.

³⁹ Xajax suma gadi† adu Yesus parib ting asilxo ne adu Yesus ido xoeng wesne adu me xaillo ne xoxlox, sisne adu mendelxo, “Xabu toto, suma wa Xotei ido Ngidibi!”

⁴⁰ Xangglxija dagi weyexya pala tinggringasi inggam xox soubxo. Andug maglib nenx, Maria Makdala ne Maria Jems kanangge xo Josep isxo anyibi, xo Salome ne andug soubxo.

⁴¹ Galili nenx xangglxija ne andug adu xumar si sox soubxo. Ne xangglxija lambeiyai dagi ye adu jagar Jerusalemx leubx ne dide soubxo.

Yesus ido gubol дума boxol maglib pidubxo.

⁴² Hameg pinhalel gereiyax ido nal, iblam Sabat.‡ Ne nomi bula nyam lililx ne kulub alox.

⁴³ silane Josep Arimatea suma, ne adu lanja xiliyai suma be kaunsel maglib, ne ye adu idoi Xotei ido kingdom xasi sambun asilxo. Ne adu ula xujalxo Pailot sib mosne Yesus gubol xasi inarlox.§

⁴⁴ Silane Pailot Yesus miyalxo sam ne xes pudox hali asine adu xajax suma gadi manjul leubxo. Sis Pailot Yesus xabu mexo e sis adu inaralox.

⁴⁵ Pailot xajax suma gadi xabe sam xe gereilox ne xabu alox. Silane adu Yesus gubol Josep huyulxo.

⁴⁶ Sisne Josep bugax xapox dagi hwaasine Yesus gubol pes miyangbe yogolsine bugax xapox maglib persine ngalagalox. Sisne дума maglib sub koraxo nenxabe pidelxo. Sisne adu дума ginggongsi mos sub mbour gide dulxo.*

⁴⁷ Maria Makdala ne Maria Josep ido anyibi, ne asux so xabex be xox asulane asux nyambe Yesus ido gubol дума dingginib pidoubxo.

16

Yesus mes aib tingalox.

¹ Sabat bunge xabe, Maria Makdala xo Maria Jems ido anyibi xo Salome andug Yesus gubol ildaxasi goreng kulog milal ne hwaxayoubxo.

² Nal kuluila kogli hali seng lox pinjrang lane andug gaman soxsine suma hogsixa sob minjoubxo.

³ Andug indo indo da inarayoubxo, “Suma yen sub mob be дума ne ginggongdox?”

* **15:34** Mun (Buk Song) 22:1 sam kulu suxne six. † **15:39** Xajax suma gadi ne adu handred xajax suma nen indo gadi. ‡ **15:42** Sabat nal ne ju indo arpersi Xotei donyam pidingdax nal.

§ **15:43** Sabat nal kulub dadxo. Nenxa Josep Yesus ido gubol pes xendeisi дума dinggini maglib serx pidaxasi. * **15:46** Mak 5:2 sam ne dide six.

⁴ Nedine andug weyexya sam xoxayoubxo ne дума xiliyai mob ne ginggong ba xoub minjelxo.

⁵ Andug sumaxangglixja gubol hogsixa дума dinggini ne maglib minjoubxo ne xelagu be bugax xapox hogsi sub maglib bar belixsax nenx njan asilxo. Andug adu xoxsine pudox hali ayoubxo.

⁶ Adu munjurulxo, “Nyingga pudox hali aiyaxjal. Nyingga Nasaret suma Yesus andug ana burbarbe kweing doborxo nenxasi xedelasixa e? Adu aib tingayox! Adu wanx sijalx. Wilayox so sambom ne xoxba.

⁷ Nenna mosne ido sox suma ne Pita ne munjrax, ‘Adu nomi xasi Galilix minjixo.’ Adu ido sam nomi nyingga munggrelexo ne nyingga adu nenx xoxyaxbarxo.”

⁸ Xangglixjax ne do kakarnjisne lolol ayoubxo. Andug sumaxangglixja gubol hogsixa дума dinggini so ne udis baxeingasi minjoubxo. Andug ulasine, nenxa sumaxangglixjax be sam mundijal.

⁹ Wik kujex ido nal, nal kuluisi kogli hali tenemxo, Yesus sumaxangglixja gubol hogsixa дума dinggini sob sam tingasine Maria Makdala sib mete dalxo. Xanggli ne adun 7 mundor hali xendei huyulxo.

¹⁰ Maria mos suma dagi Yesus jagar soubxo ne andug yamu asoubxo ne mos munjurulxo.

¹¹ Adu andug xanggli nedana Yesus tingalox ne xoxsine sam munjurulxo. Nedine andug xes ne xabu o siyal.

¹² Bunge sox suma lilxo ne taun xoub xensoulxane Yesus asux sib kulubeasine dalxo.

¹³ Asux ana sam ne les suma kur be mendulxo ne dide andug xabu o siyal.

¹⁴ Bunge Yesus ido sox suma 11 pin hesoubxane Yesus andug sib desne ngesernjulxo ne andug adu xasi udud tei pe jal. Ne dide sumaxangglixja Yesus aib tingalox nenx ido sam munjurulxo ne andosomx xes pejal.

¹⁵ Adun andug munjurulxo, “Miyanghanggu kumogxbe mosne sam beli wa sumaxangglixjax kumogx pubblab dis munjrax.

¹⁶ Sumaxangglixjax ye sam wa xen udud tei pena yag kunggu ayaxbarxo ne Xotei ana andug gagrenjin kagonjudxo. Nedine sumaxangglixjax ye sam wa xen udud tei paxman ne adu hwa pin hali padxo.

¹⁷ Sumaxangglixjax saxasi udud tei pes saxabarxo ne likong dagi andug ana yaxabarxo. Sa hajo donyambe sam andug mundor hali xendeinjis saxabarxo sinane andug men bulnane sam kexei mendaxabarxo.

¹⁸ Andug bogi barga paxbarxo, sin dide andug ngaram pin heaxabarxo ne moreng aiyaxbar andug barge gembax suma usub pidax barxone gamba pong dunjudxo.” Yesus adun sis munjurulxo.

¹⁹ Aiyama Yesus adu andug jagar sam xuradisne Xotei ana adu pesne Hevenbe woxsine ido barge belixsab njan dixu six.

²⁰ Silane ido sox suma so kumogxbe mosne sam ne pubblab doubxo. Aiyama idoiya andug jagar kinggal pesne likong kumogx yisilxo ne ido sam bail desilxo.